



ル 5  
3134  
7



門 儿 5  
3134  
卷 7

南潯志卷二十九

里人周慶雲纂

災祥二

清順治二年大水渰禾四年大饑米石價四兩五年大疫六年  
 二月雷雹五月大雨水溢麥無秋七年大水八年正月地震  
 春夏大水斗米四錢五分九年大水饑十一年冬大雪旬餘  
 大寒太湖冰厚二尺十二年二月地震六月又震秋旱蝻十  
 三年大水饑十四年七月民間傳有妖人叫攝生魂白日呼  
 人姓名即隨妖人去賣與邊地又翦紙為貓虎形夜出壓人  
 爪傷面目居民竟夜鳴鑼鼓自衛逾月乃罷

吳陳炎曠園雜志云康熙年間嘉湖二郡有狐精至鄉市皆徹夜鳴鉦不絕稍懈即被傷如爪痕後知為道人妖術翦紙為狐以針為爪晝則收之夜復

南潯志卷二十九 災祥二

况而遺之假是以行竊耳如是兩月十五年地震大水冬雷  
餘後安疑卽此事誤以爲康熙時耳  
十六年大水十七年九月霜降不殺草十八年大旱米石一  
兩七錢

康熙二年五月雪大疫三年閏六月雪四年大水饑五年秋大  
熟斛米二錢田之所出不足供賦稅菽粟盈倉委之而逃百  
貨充斥無過問者民間號爲熟荒十二月地震六年十二月  
雷七年六月地震生白毛八年夏大水十月大燠雷雹九年  
正月大雪星隕聲如雷五月至六月大雨太湖水溢禾滄九  
月雪十二月大雪丈餘

董漢策野老歎庚戌年作落葉空村鳴蟋蟀野老吞聲坐寒日  
含悲三歎拙言辭歷訴窮愁淚如滴憶昔孩提全盛時黃

雲滿畝飛香秫何意陽侯鼓怒來昫昫禹甸皆流澤雲華  
電發墜妖星寶曜沈埋洩雲出天吳啼嘯乘陰風舞浪馮  
夷恣奔逸吁嗟乎誰召羲和開漆室手挽熒黎免漂洪陽  
微陰憤如珠稱鑑江湖溝洫較若畫一望日觀兮甚遠馘  
商羊兮無術老妻弱女餒且號麥隴嚴霜淨如拭夜呼萬  
一迫征徭窮老將投虎狼窟吁嗟野老且勿悲鄭公發粟  
出淮徐汝欲不死休惕愴温公不遠汝但呼君實 又漁  
父行洪波原隰平町畦漸迷徑荷鋤已無家遂發江湖興  
持竿往田間愚畧坐朝暝習笱匠心成烹鮮迺懸甑漁父  
曰魚行有道舉網獲鱗誰識要妙田父曰吾行我法水流  
汨汨兩岸爲畢羅探囊唯泳沫異哉今之耕者不如漁體

不霑塗民無稅租脫令一日田禾熟竊恐虎冠相刺促

又寒江歎遊子尋春看未足潛行秋水寒江曲楓冷唳鳥

秋欲醒隱隱悲聲出茅屋昔年庾廩稱陳因今年禾稼輸

波臣昨夜飛鳧下鄉里縣帖徵糧方取新嗚呼悲哉丁年

如此生不如死天不雨粟官逋日蹙甕頭無米益無春吏

呼何怒君其問水濱狼豕俄躑躅悲哉農夫膺貫索以頭

搶地胡然而帝巖城鼙鼓催嚴霜官衙庭燎如熒煌古語

有之絲不如竹竹不如肉簷前兒女任嗁號堂上鼓吹聲

斷續按是年董漢策有救荒條議上巡撫范承謨並見施行足為後法惜未見其文不得錄入志中也

康熙十年五月至七月旱蝗十一年春旱夏大水民竭力屛救

秋將成八月初旬忽大風雨降小蟲青黑色如蠛蠓又如蟻

有足有翅飛蝕禾稼立槁氣侵蠶種亦空民大饑九月桃李

花十二年除夕雷電十三年大水十五年大水十一月地震

十六年元日雷震大雪旱十七年大水無禾十八年蟲災十

九年大水二十一年春恆陰麥無秋大水二十二年春久雨

麥無收麥石銀一兩八錢米石八錢秋旱荒冬大寒忽暑熱

雷電二十六年大水秋螟食禾二十九年十二月河冰不解

三十年大水無禾三十二年二月大風霾五六月大旱九月

大風雨河溢滄稼米貴民饑三十三年旱大疫三十四年大

水三十五年七月大風雨次日水漲三尺餘三十六年大水

三十八年霍潦傷稼三十九年旱四十年大水四十二年

三月大雷電四十三年大水四十四年三月大雷電六月三

日龍風大雷雨晝暝四十六年夏大旱石米一兩三四錢十月四日河水暴漲石米一兩八錢四十七年二月大風雷雹五六月恆雨渰禾石米二兩二錢民饑董志作四十六年大水四十七年大旱乃兩年事互譌四十八年四月雹大水饑夏斗米一百八十錢施粥於妙境庵中四十九年五月淫雨五十三年大旱五十四年四五月連雨六月七月大風潮五十五年五月暴雨水溢苗盡爛五十九年夏旱六十年夏秋大旱河底龜坼六十一年七月星竇有疾聲大旱冬木冰

紀遠震雷記有聲自西南來隱隱砢砢若將大雨者已而雲解風動林影調刁斜照滿地余時寓博陵之別館偶晚飯後乘輿步歸比至家大雨如注霹靂終夜不絕聲及明

至館而屋已傾矣長垣連十數丈俱仆若匹練無零亂者觀者咸歎為異且賀余之幸免於厄也余曰天下事何者非幸人特以己之幸笑人之不幸而欣欣若有得焉而彼不幸者又若戚戚焉病人之笑而不以自釋也觀此可以悟矣時丁卯五月廿一日也

雍正元年夏旱二年正月大燠七月大風太湖溢四年八月至十月恆雨水浸陂塘村人駕船刈稻頭饑八年五月大水十一月地震十年正月天雨豆七月大風雨傷稼九月大風雷十一年夏大旱十二年四月大雨雹損麥十三年七月地震有聲如雷

乾隆三年旱蝗九月大風雨雹十年夏旱十一年正月雨水冰

十三年五月雨雹六月米騰貴斗米白金三錢通判吳繼元敦勸殷戶平糶七月陳名榮接任亦如之至八月終乃止十四年夏疫十六年夏大旱石米白金三兩勸捐平糶十七年四月初四日地震六月初六日昏時星實有聲八月大風拔木久雨大水十八年春夏久雨蟲災秋又久雨

〔方熊秋霖行〕長河黯淡秋氣肅愁雲冪歷秋霖霖曉來起看阡陌淹阡陌之人聚相告弟語兄曰五月大雨新秧漂泊絲錢盈貫米一斛悍吏徵租狼虎酷父語子曰七月久雨洪波泛漕通償赤手貨告難耘車戽徒枵腹我聞此語已頻蹙旋見淵藪水久蓄四野溝作渠百里陵爲谷甌婁宅草萊沮洳葑藍或君不見去年八月大風雨白水壓

岸風摧木旦晚號呼幾三旬濤奔浪涌人躑躅今年春與夏幾次苦沈陸際此更縣縣青苗偃芊羸况經螟蝻害枯黃一畝能收幾斗穀老農老農拭眼對咨嗟稻花香遠空成熟妻孥救口何暇計冬糧難免遭鞭扑

乾隆十九年水損稼二十年淫雨損麥石銀二兩五錢蝗蝻生大水傷禾石米三兩二錢十二月地震

〔方熊粟貴歎〕饑驅不待時難冀秋熟早仰屋徒呻吟奔馳心悄悄經營給半菽無計謀一飽三春雨雪飄二麥愁枯槁夏秋捲洪波蝨螟都消耗鴻雁鳴嗒嗒于野莫控告瀕冬米價昂不啻珠與寶所賴估舶來應接庚癸譟側聞江南北亦復苦水潦淮徐咽吻地鳩形時載道沿海數州縣

索食散飛鳥念此心茫茫所憂非藐小富家擁倉困紅朽  
積山島高坐不肯賣猶嫌時價少交新猶如此來秋那可  
到吾儕本惰民麤糲亦云好計日數錢刀量腹度昏曉土  
突寒無煙沙覆塵瓦沼牀頭一斗粟八口最易了憐視少  
陵女嬌癡曉且酸哀哉陶公子何處覓黎棗傾囊笑郎罷  
開篋無衫襖曷以支凶歲枵棘飢腸燒嗟彼襤褸夫力作  
空茹蓼罄懸無需貯荒畝泣青草告貸諒所難延望官庾  
糶

乾隆二十一年春大疫饑二月石米二千八百錢民食榆皮草  
根甚有搶劫者四月石米三千四百有奇餓殍滿道勸捐平  
糶五月旱十月地震二十三年夏秋大水二十四年秋蟲傷

禾石米二千四百錢二十六年大水二十七年雨損蠶收六  
月旱七月大風雨積水經月二十八年五月地震二十九年  
正月地震五月又震三十年正月地震大水三十三年大旱  
四月雨雹三十四年春夏霖雨連旬損蠶麥大水田禾渰沒  
秋無收石米白金三兩三錢

方薰愁霖行歲在屠維赤奮若吳越之邦水橫溢白頭老  
翁駭且驚歷遇水災今第一一春淫雨輒浹旬陽和黯黯  
春無力立夏已過小滿來踰躔又復逢箕畢十日曾無一  
日晴溜聲不絕天容墨菜畦汨沒子抽芽麥隴漂流穗垂  
黑桑根浸水桑葉黃葉貴蠶饑婦姑泣心頭剝肉瘡莫醫  
八口磬磬懸室村毗忍餓救新秧桔槔歷碌翻龍骨喜

聞溝水退潺潺拍手相慶好栽植豈知五月交六月大雨  
 連旬轉蒙密銀河落地天瓢傾長如貫纏挂千匹電光閃  
 爍兔目盲雷車碎旬陽景匿陡然赤地湧鯨波洶洶頻漲  
 十餘尺黃昏閭閻竈鳴蛙平原處處通舟楫村南村北無  
 完居十家九壁愁敲仄我惟擁被向壁臥如蠶縮繭鳥塌  
 翼控德最苦襤褸氓面目盡形鳩鵠色時過小暑田未蒔  
 那有新穀糶五月東風況復防圩沈築隄規土爭匍匐深  
 宵驀地人喧譁鳴鉦呼號似攻賊丁男欲救空彷徨老農  
 相對惟歎息去年旱魃降奇禳禾稼焦殺屯膏澤今更大  
 水困災黎沈溺顛連至此極忽聞米價昨驟昂貧家無復  
 黔我突幸邀曠典免官租終夜苦雨奪民食五行舛錯天

公癡屏翳之神獨受職誰能手持陽石鞭一掃重霾見天

日

夏耀曾田夫詞田夫耕作身家所依賴也乃一遇水農家  
 潦輒向主人誅求無已焉感而作此

重三時雨水宜適可今茲何太多嗟嗟愁殺我田夫動

成夥語語須青蚨好辦禦水具爲主去救圩田夫一何

愚衣食從何賴田夫原不愚水車照田派斷釵并敝褐

典錢付田夫趣辦禦水具爲我去救圩踏得田中乾大

暑已過矣插得田中秧立秋幾日耳救得尙自可淹沒

愁殺我側聞長興縣萬戶斷煙火六解

乾隆三十五年春饑冬大水三十六年十二月雷電四十五年

鎮大火東至大橋西至臧家街北至鹽店橋延燒數百家堪輿



一貫作辛丑則四十七年六月地震五十年大旱蝗自五月

為四十六年譌至七月不雨溪港皆涸苗盡稿六月石米二千八百錢十月

石米三千八百錢九月十二夜大火上塘東至董宗伯第門

前西至清風橋下塘東至三板橋西至絲行埭延燒四百餘

家是年水皆西流

丁蟾去冬大水民田半淹今春行乞者踵至余亦炊煙常

自冷無以給其求也官蛙雜沓擾民田十室村荒九磬懸

司命何神延絕命禁煙非節渺炊煙同胞羣識橫渠話後

樂誰希文正賢無奈陶公常乞食不須衣鉢藉君傳

楊鳳苞催租行昨朝府帖下今朝吏捉人手持白木版叫

突東西村黃蒿空卷小家屋日晚轆釜煮榆粥打門租吏

搜糞粟老翁踰牆走老婦向隅哭鄰雞上樹狗齧鯨

宮倉行倉垣新築三丈高中有曲房為遊遨笙歌酣宴夜

復朝倉前朱書一行字憫今秋熯苦車水願納五折貸爾

死下廩小吏貂襜褕怒罵稅戶同叱奴責令額外俱交輸

叩頭哀告寬鞭扑歸去賣兒并賣屋乞符鄰邑糴餘粟大

旗閃閃雙門開兩邊虎翼如雲排半醉縣官呼殿來

方燾乙巳苦旱旃蒙大荒落旱魃肆慘酷五月至六月日

日懸晴旭昨聞父老言有雨在中伏如何秋已交蟲蟲更

炎燠老龍死泥中雷車竟折軸良田皆龜坼黃塵揚溪瀆

桔槔具已窮瓢水勝珠玉嗟哉襤褸氓無策但仰屋米價

市日騰病熱且枵腹安得天心仁一雨慶優渥庶幾薄有

收上輸天庾粟不然虎吏來何以免鞭撲

乾隆五十一年春大疫饑石米四千六百錢夏蟲傷禾

楊鳳苞負釜謠夫負釜妻抱兒饑驅出門何之道逢人食  
人更誰知爾汝故鄉今難爰處適彼樂郊得我所餓鴟嘯  
枯樹下有破垣乞食叩主門主人朝出採榆暮歸徒手無  
夕餐請看冷甑生塵主與客兩相視淚落不能止

乾隆五十四年大水五十五年大雪饑十二月雷電五十六年  
大水五十七年五月地震冬無冰五十九年七月大風拔木  
寒如冬

嘉慶元年正月大雪苦寒九年五月初至六月大雨田禾渰沒  
者十之七斗米四百二十錢勸捐平糶

董宗海甲子端午節後大雨至六月初晝夜不絕詩以誌  
之今亦太平世胡不十日雨緣何滂沱時一夜乃尺五天  
道有陰晴我民何太苦陽春始負耒震霖霑壤土但願黃  
梅肥桔槔移廢圃豈知入夏來天漏更難補羲輪黯無光  
雷師未停鼓日夜但傾盆不待商羊舞藻萍泛井竈魚蛙  
生甑甑桑田變滄海茅簷敲遠浦衢路教褰裳濤聲喧扇  
戶老農豈無知罕聞亦自古瀦蓄技亦窮疏濬力難努民  
曰吾其魚 堯廷非無禹安得排且瀾令民寧其宇薤燒  
暑溽退陽光乃煦煦秋到始插秧秧盡何所取晚歲有良  
田汨湮難勝數但聽仰屋嗟安望曾孫庾菜色憂誰分挾  
纊溫誰撫幸賴 天子恩軫念開神府農官緩催科小民

得安堵豫爲其始謀良策藉九扈牟麥歧雙秀嘉禾穎合  
吐明年大有年行看人四輔

董襄大水謠蟻封牖鳩逐婦濕雲處處壓深柳三日五日  
不放晴爲霖爲潦騎月久廉纖不斷疑漏天滂沱勢急將  
溢畝天目之泉奔放不少留縱橫蒼雪難容受轉眼禾稼  
場忽作魚鼈藪長鯨水面作人立瘦蛟騰波老龍吼南阡  
北陌水決隄夜半驚喊村人走鳴鑼擊鼓聚眾鄰速教捍  
禦防塘口雨聲鑼聲聽不辨巨浸汪洋沒星斗野屋將齊  
處土肩低田漸及農夫首翹首望滿塍青苗復何有或逐  
水漂流或爲水浸朽何堪銀索尙傾盆開晴直待三庚後  
邇來半月勢不退野老呼天莫措手連肩入縣報水災官

吏停徵方飲酒

施國祁積雨積雨熟梅候水勢天目壯濤聲三百里汨沒  
翻海藏茲鄉實下流川灌駭排浪田苗插未半千夫走農  
餉桔槔轉日夜霖霖適過當冤呼遶村急野火照灘旺眞  
恐狂瀾倒隄齧不容障喻如瓠子決竹少淇園仗一瞬化  
沮洳終斷秋成望蠶飢春收薄口亟夏飽饑力竭此厄遭  
檢括到盆盎河復縱計日支困已大創漫漫浙西水久並  
東海放常漚二十七結葦阻沙漲垂虹七十二罨岸編臚  
舫尾閭不以泄乃作懷襄蕩愁絕水晶宮未免魚腹葬偉  
哉樂存編石畫言言謹莫惜一勞勩溺援窮黎愴緬思李  
公蹟奮發神先王

嘉慶十年春又大水麥無秋斗麥四百八十錢巡撫阮元發銀

施粥按是年粥廠設于潯南之神墩一切條規精審詳密並足為後法具詳張鑑所編兩浙賑災記中十三

年夏霪雨米價騰貴十九年正月初四夜訛言太湖盜起民

多驚走五月至七月不雨地生白毛禾半槁石米五千三百

錢大吏招商給以印票行文福建州縣倉儲有餘者照福建

市價派撥令商繳價海運至浙免其關稅價始平二十年二

月初旬大燠既而雷電大雪二十三年五月大雨雹二十四

年夏旱

道光元年夏大疫二年正月大雪經旬夏旱三年霪雨自三月

至五月不止禾未插秧大半被淹六月初七日大雨雹水勢

漸退七月初二日大風驟雨水復頓漲數尺圩田僅存者是

夕皆沒太湖水溢至冬初始平官勸殷戶捐資施賑按冊散

給大口每日米半升小口減半約五十日米石價錢四千五

百次年春夏復賑大口每日錢十文小口五文凡七十五日

**張鑑題水災紀事冊** **縣雨** 水沒頭雨沒尾盲風兼旬吹不

已苦竹叢深日鳩語逐婦聲高人轉哭老魚橫飛上鄰屋

**踏車** 上留田水沒狗下瀝田水漂白三男五女踏水車犂

犂确确蛻骨蛇杷頭菌出鎌衣長今年水腳過兩丈築壩

螳穴漏金隄大小理則齊屯皮木椿須應手鳴鑼集夫防

決口白版雙扉復何有**補種** 夏至未至鷓旦叫勤者翻被

惰者笑刺水綠鍼日夜黃舩艦重買來山鄉補未完雨不

止早秧遲秧一例死**風暴** 五旬雨七月風黑雲如磐龍挂

空石飛沙走作風暴老鼃入市瘦蛟導帝遣天吳爲海嘯  
 報荒鴛鴦飛飛滿四野此災百年僅見者扶老挈弱號縣  
 門縣官何日行鄉村不是風潮小損稼搗鼓攀轅府帖下  
 流徙村村移家具爭權楸頭艇何許可藏身梯空羨松頂  
 畫產竈魚入門跳珠急雨還翻盆撈棺白楊樹根浪頭大  
 破冢漆燈無一箇兩和已齧題字稀撈來撈去滿釣磯陽  
 侯虐過摸金尉忍此萬千若敖之鬼無所歸勘災濕旗吹  
 船鳴菰蒲魚頭小吏左右趨官來勘災行不紆里正諾諾  
 復喑喑青黃無期患煎迫茫茫殆徧魚鱗冊天賑梵鐘初  
 動寺門啟 皇仁給帑復給米朝起望晨光車輪歷碌摧  
 肝腸道長腹餒走且僵蘆葦暮捲上北邙蘆葦見南史劉歆傳助賑

常平倉空當勸分指困納粟沸若雲春陵宰固美子敬心  
 亦勤論升論合論錙黍魚行蠹戴未滿筥剝肉補瘡不如  
 稻春熟一年無禾猶可十年無蠶則那桑空閒斧柯絢絲  
 不上鄰女梭良苗懷新幸春熟交午漲痕在頽屋牆角枯  
 桑長苔綠

孫熒苦雨歎兩月淫霖不肯止薔薇花落鼠姑死簷頭漏  
 下如亂麻門外泥深愁沒履荒草滿階人不到但有蛙聲  
 怒聒耳幽人遣悶尋清課坐揭爛書日百紙朝來窗隙漏  
 晴曦眾鳥爭鳴如有喜忽然鉦鼓聞集眾畚鍤來救圩岸  
 圯枯槔連夜水益漲中隔一隄僅尺咫更教數日雨翻盆  
 眼看平隄入江水 國家租賦仰三吳疲民力作供官裏

豆麥已壞春事去惟望秋成秔稻美皇天仁厚終愛民及此轉機禍可已哦詩直欲叫閭闔又見西南陣雲起

諺云西南

陣帶過落三寸

又平糶行平糶不予市僧權計口大小但給錢大口十日給錢百糶米祇救兩日活小口五十更可憐枵腹應將草根掘侵晨古廟何纍纍鳩形鵠面行相隨官頒竹籤當符節唱名對簿關防施或作晉鄙兵符竊李代桃僵難究詰或如告身易一醉妻兒無糧但聚泣東風吹兩行路溼易米歸來煮糜食中田又見菜麥壞盼到秋成那可得吁嗟乎豐年錢多盛賽會凶年錢賴富民貸富民錢盡賑不長茫茫來日憂方大

金錫桂勘災行羣胥切切夜深語明日下鄉勘災去斂民供官不敢行那得私囊覓錢處前旌泊野塘鳧雁相回翔鬪體如瓜破塚出隨波汨沒爭擊撞狂飆連夜拔大木水面搖搖數間屋里正指點爲官說卽此已是天上福其餘積塌無幾存低者及樓高浸門鴝鷓鼓翅坐屋角亭午不見炊煙痕室廬墳墓類如此高田低田可想矣非無足穀翁亦有多金子不住窮鄉住城市重門擊柝禦暴客怕聽人言糶平米災民望勘如望歲官去依然水不退嗷嗷待食無已時九重高遠恐未知災狀猶聞三等施

又平糶行和孫愈愚作去年潯人糶平米斷斷界畫分彼此今年糶米震澤人兩月以來人不分同一平糶勞逸殊

溇人何智震何愚溇人語震客止須勤編尺一籍事既易  
辦費可惜安得南溇混震澤震客告溇人我鄉地廣皆貧  
人人人顧近不顧遠其勢獨苦窮鄉民果如君言定戶口  
依舊流民滿街走爭奪相殺無不有吏爲攢眉官掣肘規  
畫井井各較然古寺設廠何喧闐溇人大口給錢十日  
一百青銅錢震澤小口米合半彼此大小總倍算溇人十  
日九日閒一人到廠餘在田震澤發米無虛日紛紛婦子  
如螻密始猶數千繼數萬困廩將空歎無術傳聞索米人  
太多擁擠不畏官吏呵強者在前弱者倒赫然死人橫當  
道吳船赤馬行如飛擊撞檣艫爭先歸長年失手船則覆  
死人愈多網不漏嗚呼斯民不來固死來亦死忍死來爭

數合米不知發米日餘幾兩眼睜睜望田裏溇人孫君作  
爲平糶行其詞沈痛多楚聲豈知震澤之人苦亦極求生  
不能死亦得遙望南溇尙樂國

夏蔭棠水災行女媧煉石不可又沈沈難補蒼天漏連縣  
三月雨不休水怪欺人唬白晝農夫桔槔夜繼日急取塗  
泥填岸缺拋將板壁及門窗恨無萬丈橫江鐵哀聲徧野  
妻孥號愁雲低羃天不高雨止能邀晴幾日龍風又起聲  
滔滔水龍酣鬪橫空下倒捲波濤向天瀉向天倒瀉勢如  
傾青山欲奔白石化不聞知命避急流但見橫尸水面浮  
舊時打稻場寬敞而今變作魚龍洲吾聞爲政無定法災  
小災大宜分畫表其疾苦獻朝廷輸民征稅酬民乏此外

小惠皆沾名勸農補種言何輕縱然穀可種地理難變更  
處暑後插秧無乃非人情從來天下之溺由已溺 聖人  
知之有恩實竚看朵朵慶雲飛捧出當頭一輪日

董恂七月初二夜大風作歌十日五日雨不少一尺二尺  
水沒道蜚廉呿怒風姨從始猶飄塵繼偃草黃昏漸作刁  
刁聲三更四更勢尤撓退飛六鷁事可驚號怒萬竅聲空  
擾雨腳截住下不能飛龍倒捲空中掉瓦片多同蝴蝶飛  
樹頭相併猢猻倒浪走高從人顛過牆頽響壓雷聲小書  
生膽怯不禁嚇徹夜不眠坐待曉

道光四年春大飢米石錢五千六月十五日大雨水勢驟涌平  
地數尺次日始退

孫燮米價昂甚而酒肆羣飲如故詩以誌慨桂玉朝來已  
斷炊得錢沽酒且酣嬉屠門大嚼喧闐甚眞箇凶年食肉  
糜

道光七年十二月大雪雷九年夏秋旱十年夏旱十一年夏霖  
雨秋復久雨水災野鳧成羣食稻

金錫桂憂旱行濃雲日日四野垂亭午一過狂風吹百里  
以外皆霑足旱魃獨虐潯之湄長官齋沐事祈禱紛紛緇  
素兼紺尼暑不張蓋勞不乘侵晨先眾迎朱曦芳塍漸作  
龜甲圻狹港水膩流凝脂竹爐澁注活火沸須與茗盃浮  
喻糜道士墳頭水清澈擔僕踵接肩相隨我家家臨頓塘  
上微風蕩漾生漣漪一灣水自小橋入艇子不足容瓜皮



南齊志 卷二十九  
三  
朝朝提甕艱出汲妻孥接手愁雙眉竭來書館發長歎心  
思窒塞精神疲殷雷昨夜南山陲神龍恍現鱗之而甘霖  
到地不破塊荷盤滴瀝風傾敲繁星皎潔河漢澹新涼已  
覺侵人肌江東米價消息好幸不翔貴虞調饑更得翻盆  
一尺水雲師雨伯日交馳徑須跂腳北窗下披襟高詠羲

皇詩

董蠡舟禱雨謠大府檄來命禱雨有誤催科奈何許大府  
理財束溼似故事奉行豈得已例禁屠宰停鞭答奏銷已  
分愆程期醕酒宵酣妾當御明日長官禱雨去不須土龍  
像攫擊不須巫覡呼吁嗟開士和南諷梵唄何肉周妻新  
受戒亦有奪壻瑤光尼胡粉飾貌塗唇脂東方未晞月出

皓齊共長官來致禱陵天俄頃翔金鴉田夫炙背方踏車  
僧尼還寺官歸署追涼共繞池邊樹少焉有滄齊興雲始  
信至誠能感神太平之世不破塊詰旦刲羊虔報賽上憂  
國計下恤民縣符夕下晨開征鞭痕請視疲農背長官德  
政豐碑在

又久旱得雨作歌千夫舉首皆欣欣前山有滄初興雲會  
見天瓢快傾注滂沱慰此羣情殷西郊不占小畜象僅得  
霖霖沾輕塵有如束之高閣輩蒼生屬望方慇懃及其設  
施竟大謬虛聲純盜何足云郭外邨農走報我昨夜急雨  
翻瓶盆咄哉距此無十里畛域儼若分粵秦得非屏翳私  
敲法號令毋乃乖平均我歌且謠未終曲箭鏃交飛瓦墮

屋繞屋爍爍走金蛇映戶森森挂銀竹愁霖不患十日并  
 豐澤已欣一犁足我家無田亦蒙惠聊為疲人洗鬱燠嚮  
 來妄欲管中窺騰口譏嘲肆漫黷人猶有憾自古然夏暑  
 冬寒輒謗讟耕田值雨刈值晴私喜皇天副所欲詎知德  
 怨兩不任玉霄高拱神清穆么麼下土蟣虱臣口語細過  
 不足錄放教穩睡夢周公飽飯坐享豐年福

張丹山辛卯霖雨大饑郡伯楊公紹霆來潯會諸董事者  
 於別駕署勸捐發賑是晚天微雪郡伯感賦一律屬紳士  
 和之仙鳧飛下愛山臺破曉衝寒數舉杯人歎千家爨煙  
 絕天教一路福星來計籌里社常平粟詩憶鄉關驛使梅  
 寄語榜人須借寇莫教風便片帆開

董蠡舟報災謠報災人出縣門低頭飲泣聲暗吞仲秋久  
 兩岸屢崩町畦立化波漣淪收租計日開倉困輸將何出  
 急走報令君令君奮髯抵几大怒曠收租計日開倉困決  
 以大杖驅出門旁觀太息為不平曷勿訴之大府庶得伸  
 野人畏憚郡縣尊何況大府威嚴若天神報災人出縣門  
 開徵明日徵官銀俗謂夏稅為官銀

又秋雨歎五月六月雨不休大水漂溺連四州江寧南昌武昌嚴州  
 西吳雖潦幸無害東作未後期有秋秋成其奈垂成敗十  
 日曾無三日霽夜窗不忍背燈聽一宵萬戶農心碎老  
 農歎息中夜起只恐高原亦出水桑土被齧盡露根禾頭  
 已沒難生耳舊穀食盡新未登青錢五十糶一升賣絲輸

稅尚未足忍飢踏車能未能

又野鷺寒空排雁行落日翻鴉陣未若此野鷺作隊數逾萬蔽天蝗蝻密動地風雨迅今秋水冒田禾頭存亦僅何堪果爾腹百畝無一瞬老農徒拊膺爾生于我浚慧非鴨能言信異雞司旦乃如金翅鳥龍子恣吞燕鴟梟嚇腐鼠初不爲人患涎涎音電燕啄矢知分安卑賤爾鷺獨不然饕餮忘禍難蒼鷹飽餘粒搏擊爾無憚一朝下霜雉毛血平原徧饑鳳九仞翔回首爲三歎

董恂報災謠報災人互相弔今年遇災無可告報災人轉相賀勘不成災災可作則箇切君不見山頭猛虎身負嶠過其下者無全軀又不見天際蒼鷹張羽翼當其前者爲所

食報災人淚如漬虎不得避餓鷹鷺俯無以育仰無事一災不除一災至報災人且勿愁君不見虎將變鼠鷹化鳩禽獸逃匿歲有秋

金錫桂大水後到家口占浮梁曲折駕漣漪四壁空明把釣宜道不拾遺門不閉極荒翻似太平時米是珍珠桂是薪果然九食要三旬麻姑能撒吳剛斫一樣神通不療貧凌波樹在方知岸壓水橋低總礙船卽此茫茫已滄海今年四月尙桑田苦搜蓋篋舊衣裳質庫歸來辦宿糧割肉補創原險事療饑那更禦冰霜

又偶晴偶晴仍欲雨天意竟何如豆麥已無實蠶桑知又虛壞隄難再決破屋易成墟平糶資豪右困倉有幾儲

南漳志 卷二十九  
道光十二年饑築運河石塘以工代賑夏旱

董蠡舟乞食行澤國當秋苦炎燠有水可辱害猶淺詎知  
一漑僅後枯儼若畎田耐風旱去年有 詔寬賦租幾曾  
霹靂飛官符新絲不用輸井稅舊穀尙足供朝餉旱未成  
災聊藉口竊幸皇天不雨久叫呼乞食橫索錢婦孺扶攜  
競奔走鱗萃蜂攢踵相接千百成羣畢入邑恣行誰復敢  
譙訶以早怵人以眾脅凶年原合食肉糜屠門一掠空無  
遺沸騰何啻吹唇眾盜賊公然對面爲議卹豪家恐禍迫  
半陌青蚨徒手獲但肯朝朝蒙袂行轉贏夜夜當窗織命  
儻嘯侶相招要寅入辰退殊逍遙蓋藏貯見金籩積暘雨  
翻愁玉燭調旁觀蒿目爲三歎豈可噢咻長驕悍鄉閭誼

合瞻窮黎莫把貪狼當哀雁

道光十三年雨水害稼冬久雨

趙棻書感如環愁緒總無端儉歲持家事事難斗米直須  
錢五百相逢不敢勸加餐

又老農歎今年三伏天不熱陰雨連綿少晴日低田秔稻  
熟已遲那更飄颻半無實猶恃山田慶有秋黃稔定卜倉  
箱收豈知秋分前十日嚴霜一夜飛山頭老農朝來淚不  
止忍見嘉禾凍將死半年辛苦竟徒勞功敗垂成有如此  
嗚呼上天視聽在吾民蒼生疾困誰當伸側聞召杜膺薦  
擢彼哉長吏何其仁

道光十四年正月初二日大雪秋雨傷稼冬復霖雨

董蠡舟秋雨歎闕逢敦牂建申月丁亥二十有四日一月不雨兩兩夕曉起驚看百川溢低田水冒厚莫由高田水深沒禾頭饑饉相承農乏食踏車其奈饑無力嗚呼皇天匪不仁致災無乃由斯民何當反樸息機械世有淳風無惡歲

道光十五年夏旱十六年正月初五日大雷電二月十二日大風雨雷電雹十七年正月初二日風雪雷電雹夏旱秋久雨  
孫燮秋雨絕句 桔槔長夏老農嗟恨不移田近水涯天意亦如人反覆秋來又踏大鞦韆

道光十八年除夕大雷電十九年正月雷大雨雪九月二十三日地震大風淫雨禾頭生耳十一月雷

孫燮戊戌除夕雷雷聲除夕壯父老駭希聞匝地陰霾合催口暖氣薰天教陽洩早歲到夜深分不盡憂時意燈前酒半醺

薰蠡舟一雨三旬久不雨一雨一月逾潺潺徹昏曉潢汗盈街衢今夏有小潦插秧向沮洳植根不牢固離披若葭蘆土化糞力厚纍纍實尤腴禾頭日加重敲側不可扶遭風皆偃仆一望千畝俱及茲盡淹漬何啻沈江湖豈僅患生耳得無潰爛虞吳中近生螟立見稟枯枯豐歲忽成災民氣何由蘇我雖乏負郭三歎爲踟躕

道光二十年夏久雨二十一年春大水秋霖雨大星實于西南有聲如雷十一月大雪爲災平地積數尺

孫燮雨中作自從哉生明至于月下弦中間二十日簷溜何曾乾百草多爛死豈惟惜花殘湖鄉生計薄所恃蠶與田平田在水底菜麥已蕩然矧茲蠶月冷竊恐妨三眠衣食源並塞廉耻道欲捐側聞徵稅早鄉氓咸詈官豈知急軍餉爲官良獨難腐儒志四海活民手無權殷憂在局外作詩但籲天詩成天又雨雷急如迸泉

董蠡舟仲冬二日雪至五日未止作大雪歎百歲老人未見此大雪四晝夜不止深埋馬耳沒牛目飄瞥朝來還未已同雲一罅開朝陽瘦日如月寒無光曾冰峩峩泥滑滑出門咫尺皆太行今歲穫遲緣雨久收餘什一猶棲畝及茲壓損委泥沙待得雪消復何有君不見牆頽井塌屋半

傾路有凍死尸縱橫元戎帳下方歌舞誰念鐵衣屯戍兵

道光二十二年六月戊寅朔日食既陰雲不見晝晦久雨二十三年七月旱螟食禾饑

孫燮秋懷頻年淫潦災水漬禾根爛今茲逢歲稔農人待飽飯秋後螟忽生食心人不見漸漸苗葉黃偃仆過一半眼看又災荒官糧何由辦繫予守硯田感此輒三歎養性如養禾詩書爲溉灌邪說一以蠱志識爲之變豈獨苗有螟人心螟食徧一日復一日涼飈忽然至一年復一年故家有時替我生乾隆中民物極昌熾此如盛夏暑中已含秋意禍始甲子災先秋梧葉墜從此災相仍淫雨連歲歲其間最甚者辛卯與癸未近復苦用兵征輸民愈匱閭

里舊富家十不存一二造物忌滿盈繁華有顛頓百年大春秋俯仰盛衰異誰能戒履霜預為卒歲計

道光二十四年冬久雨二十六年六月十二夜地震二十九年淫雨大水田禾盡沒米石錢五千六百民屑榆皮為食有雜以沙糖者食之輒斃施賑大口每日給錢十二文小口六文自七月至次年三月凡二百六十餘日七月係散賑八月設捐賑九月至十一月係大賑十二月至三月仍係捐資助賑共捐錢五萬餘千散賑者不在此數七月二十四日張王廟發賑人多填咽忽金光眩目聲若震霆自相踐踏死傷者八十餘人三十年春饑米石錢六千

許旦復十哀詩序道光己酉之災較甚三年凡沿路捐瘠窮鄉坐槁者蓋十二三矣見聞所及雜次成詠聊以抒其

哀情非敢擬白傅秦中吟也中有因事指斥亦是非直道之公爾折股怨我鄉錢氏子一錢慳如命眾怒積何深一朝折其脛平時二螯八跪鄉里恣橫行今日伶仃傍俦安能鬻而乘昔聞汝厥考貽謀本不良延師必訟師讀律好恃強髻年便已習刀筆家居織兒庶克當以錢貸人息贏二息還生息誰能償須臾田畝盡折入東屯西陌遙相望催租急於石壕吏傾瓶倒篋何由藏坐使農家泣空釜纍纍看汝堆倉箱夙昔怨憤無由洩歲凶羣起逞其狂嗚呼有財以衛身何乃葵不如可憐兀兀泉臺去空空兩手何所擎一生心計務刻削財多但為豚犬餘粟傾困錢壓閣老妻泣空幃諸郎高歌樂明日整備開場轟賭博倉穀火

自昔常平倉其穀積之上于今州縣存其名正供所餘兼  
民餉由畝計合以及升由升計斗登之量圭撮積之未加  
多歲月遲之獲如創凶荒本爲掇民饑按戶編排爲施放  
以民還民力自食令君安得居功狀浸巡至近時半已入  
官橐胥吏緣爲奸久歌空倉雀一朝大祲可奈何官爲攢  
眉吏則那亟須商一自全法曲逆秘計誰能過舉而付之  
赤燄怒千鍾萬斛都由他大府聞之無復詰小民過之徒  
滂沱噉噉日向焦土哭有人從旁笑且歌嗚呼時事有如  
此誰排闥闔爲我獻此倉穀哦生傳誇胥母鄉龐公里榮  
陽姓氏高莫比厥祖席豐無吝情惠流桑梓標門榮末世  
子孫榮枯分其中尚有踵前軌咄彼七十翁詞鋒銳莫抵

奇荒謂是天所成於我何哉助錢米長吏數登門強項慳  
莫敢翻笑他家財浪拋我只坐聽奈何矣一朝饑民千百  
來隳突叫囂如驚雷闔門支戶心膽摧急哀當事捐簿開  
數倍於前遑敢推以捐爲罰貽嘲哈痛定忽然慮轉換我  
今何用空悲歎七百千文買令名抽毫手自揮生傳嗚呼  
生傳輝千秋金繒訣墓將毋求我今翻爲昌黎愁沿街哀  
水長廬爲漂水退食已絕兒女啼號可奈何含悲且共街  
頭乞豪家健僕氣如吞塵舍小夫眼欲裂低徊且復走他  
家他家門揜七八侵晨赴市道里遙忍飢直至日高揭  
腹如雷鳴頰如火熱大人猶可挨呱呱奈此懷中物嗚呼  
朱門鼎鼎暨膏粱何不薄少聊分將俾延螻蟻旦夕之微



命而令聲嘶氣鬱奄斃在門牆琳宮厄七月水退繁饑禽  
十十五五翔南林始猶數百繼數千逡巡萬數來駸駸潯  
中當事議分給先時來編戶口摺紛然彙之琳宮中六文  
小口大踰十此外行鋪各隨緣一合半合拋米粒貪此合  
米與錢文遠近蟻慕心爲熏如江如潮如浪涌雖欲禁之  
聲不聞豈知暗中禍機來莫測人人死氣面深墨七月日  
之二十五烈日皜皜當午刻二萬餘人互擠排着然有聲  
如裂帛一時驚竄相踐踰滿庭血肉屍橫藉數之四十有  
七人彼乎何辜遭此厄其餘氣息僅奄奄先後都應隨鬼  
伯母哭子兮夫喚妻睜睜直視疑含啼煩冤慘痛誰可訴  
諸天老祖頭爲低嗚呼彼爲求生反得死人鬼之關在尺

咫尺時殘喘不得延命比鴻毛輕如此天耶人耶奈何爾  
挖棺竊挖棺竊四鄉沸彼何忍哉爲此厲嘻彼非曹家發  
邱中郎將亦誰著作摸金尉饑窮所迫無復之意外出奇  
聊一試鄉村水後蕩然空探囊胠篋均無庸只餘漂流未  
盡此幽宮爲語長眠人畀我區區將無恫玉盃金魚非所  
望銀皮銅屑聊佐我尸饗易得升斗歸婦孺多歡容不然  
旦夕殉汝蓬蒿中嗚呼此罪可誅此情宜可悲長官嚴刑  
安得施不名曰盜名曰竊聊示薄懲旋出之陽侯禍且及  
骸骨天之所罰復奚辭嗚呼天之所罰誠無辭災食歎昔  
聞故老云荒年食榆樹屑皮爲牢丸薄糜煎湯注豈有菁  
英營衛滋一甌聊足枯腸飫其次芹芽與草根雜糅煮之

同供具外有觀音粉終虞石性易沈錮亦或磨稻藁撐腸  
拄腹艱流布穀食之外最耐饑惟山蕘魁及蹲鴟四野荒  
蕪那可得饋貧誰復盈筐貽嗟彼貿貿子日惟腐渣哺三  
錢市兩枚輞饑朝可度安得鹽豉加生吞我其庶嗚呼同  
爲斯人遇此荒甘苦之味宜共嘗亟買少許袖之歸入門  
童穉歡迎將謂是美饌餌精餒餒熟後羣起攫而食嘔吐  
不迭形徬徨汝曹但知日日餐杭梁那識隣家恃此爲餽  
糧不然早已委路饑且僵鬻兒痛他家兒女珍如玉保抱  
乳哺日不足瑤環繡服被其身果餌珍饈充其腹我家蓬  
頭垢面兒歲凶不能具饘粥啼饑繞膝情皇皇顧之隱痛  
纏心曲蚤晚多分不得全一家併命嗟何酷爲汝一綫覓

生機高門賣卻爲人僕得錢聊足資所生算汝恩酬育且  
鞠嗚呼鳥亦知哺穀牛亦知舐犢親生休道我寡恩欲留  
不得籌之熟送女出門行忍淚不敢哭從今不是耶孃邊  
好慎饑飽與寒煖他年倘得不餓死見面有時仍天屬不  
然槁斃原野中還當待汝收骨肉露處悲小鳥鳴啁啾日  
暮深林投鹿羣走曠野穴處呼其儔人非毛羽族寧無風  
雨謀構巢架木屋之始幕天席地非長籌酉年之夏水大  
至室廬漂蕩隨波流水退四望空濯濯何來蜃化空中樓  
其有僅存者持爲口實求一椽一瓦易米盡剝肉顧得心  
頭不秋高八九月涼風來颼颼全家僵臥頽牆陬目前寒  
露猶可耐三冬冰雪終難留不如逝者行歸休嗚呼道旁

鬱鬱誰家宅重樓複閣連阡陌簾幕深沈猶道寒何堪露  
處赤肩脊誰具仁人廣厦心令茲號寒之蟲感無極優賞  
叨未捐錙銖吝既捐願望奢優獎從重自天錫碑礫水晶  
紛喧譁或云京職貴纍纍數珠當胸挂或云外職好品級  
從同數較少其有數歉與數贏彼此買賣挹之平亦有先  
時捐實職雙單選補酬其情門條爛爛看高貼光華豔比  
泥金帖寒士蓬廬氣不揚世家門第翻莫及嗚呼涸鮒需  
勺水監河饒澄波果能分潤及鄉里朝家豈惜名銜賒何  
不廣開宏量體上之德意而徒冀倖非望以爲庸愚誇

咸豐三年三月初七夜地震冬雨木冰四年夏霖雨十一月初五日申時河水忽漲起尺餘溝渠池沼皆然北柵尤甚少

頃卽平東至吳江西至長興並同此異十二月初三夜半大

火自清風橋起西至壽星街東至通判署頭門北至天帶橋

平明始息延燒數百家五年火災頻起東柵尤甚六年大旱

蝨北柵河道涸五月十一日午刻大火自大橋灣起延燒西

北柵凡數百家十二日南柵又火

李廷廣詩作戊午係咸豐八年十二月作十三日

十六日東柵又火是年水皆西流大饑米石錢五千七年春

米石錢五千八百夏蝨復生悉入水自斃或化爲蝦秋風雨

損稼米價復昂如春八年三月彗星見自南至北長三四丈

六七月旱六月十二日粵賊至大肆殺掠未刻始退土匪乘

機縱火延燒三晝夜十五日始熄秋久雨八月彗星又見長

數十丈十六日賊復至焚劫傷人最多十七日始退十九日

申刻紅光燭天十月初二日酉刻天半隱隱有兵馬聲從東北至西南十二月十七日賊又至焚劫如前未刻方退十一年二月二十九日賊又至縱火焚掠次日始去是冬賊踞鎮焚殺三日後出偽示安民十二月十七日大雪至除夕始止深可一丈河道皆凍冰厚尺餘至次年元宵始釋

季廷廣榴夏十一午潯鎮大火戊午何處人喧嚷鑼聲歷亂

催火因風勢大風助火威來龍打全無濟鴉飛總不開火盛環繞而飛 冲天遮白日着地捲紅埃堅壁隨時倒雕梁

頃刻摧巨尊難措置時適烏程縣在鎮戶保瞻量裁樵斧薪休負

禪林芋漫煨丹霞烘畫舫綠霧壓妝臺顛蹶人憐老驚啼子尚孩一朝驚起禍四壁共罹災燄過都成炭煙銷盡化

灰登橋試一望觸景不勝哀

又十三日午又火火餘煙氣尚難清忽聽鑼聲又急鳴方

訝一朝千戶害頓教三日兩頭驚敢行遠道離家室怕寐深宵待旦明只恐災行猶未了決疑都欲問君平

又六七月之交潯溪旱甚亢旱屬天災三霄絕雨露河底盡生塵堪作人行路水道不疎通有舟何處渡流火因遊

龍煎沙憐涸鮒萬里片雲無難禱甘霖注石爍山亦焦黃徧林間樹獨惜苗已枯農人勤旦暮夜夜祝穹蒼膚寸何

時布

同治二年海水溢河水皆鹹十年三月十四日大雨雹二十二

日下午狂風驟雨拔木毀屋覆舟傷人十二年夏旱河水幾

涸冬始雨多雪大寒

薛福成庸盦筆記同治十年三月二十二日湖州有龍陣風自西方起至於南潯約及百里同時折木發屋揚沙石死者甚眾有數村被風捲去變爲平地數百年大樹有拔者

桂榮三月十四日記異熱雲翳然興天低黑如墨雷電雹雨風變端來頃刻屋瓦亦紛飛通衢水壅塞天災不虛生感時空歎息厥占陰勝陽江都語堪憶所望弭天災遇變應以德

光緒元年五月水六月七月旱八月復水田禾減收二年三月有妖人翦辮髮七月又有紙人夜出作怪獸狀魘人居民鳴

鉦驅之寢不安席至八月始止夏蝗冬久雨十二月大雪連旬祁寒冰堅經月不解鳥獸凍斃

李光霽紀異錄今年三月潯上哄傳妖人翦辮北柵賣餅某甲夜起如廁忽冷風刺骨辮已失去由是鎮人相戒夜間不敢出門并譌傳被翦之人百日必死然某甲後亦無他異至七月初又紛傳有紙妖夜間攝人神魂至則怪風隆隆作腥膻氣屋瓦皆鳴薄雲如蓋下垂檐際遇人睡壓人身其人遂噤不能言目上視手足蹶張急救則如夢魘醒而不知所以其現形如鼠如鳥或如犬而鉤爪鋸牙或如狐而雙睛閃鑠或黑氣成團或白光如練刀槩不能傷惟震以金鼓聲始逸又或入夜偶爲妖物所觸則觸處立

墳起色青黑謂之打印消息由北路遞傳至十七日而潯鎮大哄鳴金伐鼓人聲鼎沸徹夜不絕膽怯者家人婦子羣聚一室竟夜不敢合眼各鄉村亦五家十家同居十九日夜半予已就枕爲四壁鑼聲驚起推窗四望星月皎然惟聞空中有聲如大風激盪向曙始息次夜復然人心皇皇街市寂寥天將晚閉戶入室道無行人地方無賴乘間滋事什百成羣遇外來面生無相識之人卽指爲妖人搜掠財物偶值形跡可疑或縛而投諸河或舉而昇諸火枉死者眾官長不敢問訊由是商旅相戒不敢遠行八月初復譌傳尅日破湖城郡城居人遷而東者舟首尾相接盜賊蠶起幾成大變幸黃提軍在杭聞信躬率營勇星馳至

湖捕亂民裘姓叔姪立時正法謠言始息

光緒四年春寒多雪久雨九月至十月恆陰久雨晚稻沤爛七年春大火自清風橋起至大橋以東延燒百餘間十三年正月二十五日南柵水師統帶營內火藥失慎轟去營房兵勇死數人皆屍骨無存南柵房屋有震毀者十二年冬大火自寶善街起至清風橋西延及大橋之南東至分府署止延燒二百數十間十三年十二月雷十四年七八月間地生毛黑白參半形似羊毛長二三寸十五年夏五月地生毛八月二十四日晨大雨連陰數旬至十月初十日始放晴田禾盡沒早稻生芽能刈者僅十之一二紳富先集資購米萬石平糶十月間乃就十二莊查核饑戶分極貧次貧計口造冊給票

至期赴廣惠宮憑票給米五日一給至次年二月止計用錢三萬餘串十八年十二月大雪寒甚河水盡冰十餘日不解二十一年七月初十日申刻方丈港東河埠礮石忽涌鮮血高尺許不數刻岸上石縫亦涌出共七八處襪上染之其色鮮其氣甚腥二十四年六月大旱米價昂至每石六千鎮紳出資購米平糶至八月市價平始止款由鎮上殷富分任而張君寶善獨捐萬元二十五年三月於巡司舊址前及船長浜等處發見黑米水漬不化煮之不熟

李光霽紀異今年二月予僑寓無錫地下忽見黑米堅如石表裏純黑兩面起楞形與米無異水漬不化煮之不熟鄉人拾取以售人斗錢二百好奇者間購一二藏以示人

三月中由錫返潯而潯地亦見予就錫帶回少許出而比較無異謂爲天雨則應隨地皆有何以或有或無謂爲地產則應在泥塗之下何以浮面可拾又予所見皆兵火後之瓦礫場上浮面所得更不可解元史載順帝至正二年饒州建寧等處天雨黑子大如黍粟民有取而食之者而此則水漬不化煮之不熟不知是何異也

光緒二十六年三月初十日辰刻天色忽晦暝異常非然燭不能見物約一刻之久三十一年三月十五日大雷雨電火焚燬極樂庵佛像數尊徧體焦黑居民房屋亦有燬壞者三十二年六月十四日午後雷雨大風自西至東民房坍塌甚多七月大雨連旬鎮紳出倉粟平糶不足又籌借截留南漕數

千石三十四年三月初二日夜半大雷雨電火焚燒西柵垂虹橋南塊民房三楹六月霖雨鎮紳出倉粟平糶

宣統元年七月大疫十一月二十七日夜十時地震二年五月久雨鎮紳出倉粟平糶自六月朔起至七月望止除夕雷三年五月六月久雨閏六月十六夜九時大風至十七日晚止太湖水高倒灌河水陡漲尺餘七月初陰雨積日河水又漲尺許田禾被淹者十三四鎮紳出倉粟平糶自八月朔起至八月底止

南潯志卷二十九終

南潯志卷三十

里人周慶雲纂

農桑一

農事總論

張炎貞烏青文獻稻性宜水不黏者謂之秔秔之

小者爲秈農人于正月畢歲事二月治圩岸三月選種浸穀立夏蒔秧四月刈麥訖遂墾田已而插青用桔槔灌田旱入潦出四月望至七月謂之忙月富農倩傭工或長工或短工佃農通力耦耕曰伴工是後耘耔糞溉各以時無敢離畔處暑行根綻穗苦旱白露花苦風秋分稻秀苦雨九月刈禾是月築場藝麥豆子婦竭作亦謂之忙月十月治穀米往時穀既登富農供惟正外得高廩蓋藏以備凶荒佃農輸租大家



南漳志 卷三十一  
稍貯以給春作近來佃農奸頑將田中稻穀先時斲春或趁新貴糶或投典賤質妄希貿易以博利甚且不安分以圖事又或于春夏時告貸富室獨租米遷延日月藉口歲歉收薄冬盡以礮頭糶穀約略半償官司催科甚急告迫每置不問於是田主稱貸糶米上廩而田主病佃戶貸米以延須臾之死質糶以作不急之務其後貿易折閱息利倍加自此逋負益積而佃丁又病兩者交病在當事者立法以導之也 董世寧烏青鎮志稻之名類不一秬之早熟者曰早稻其徧種者曰秈稻又曰晚稻糯種亦有早晚間有種者僅堪釀酒屑以食而非小民終歲之需場功既竣遂于田中起稜藝麥小麥磨爲麵糲麥無芒色黃可作飯及餅餌蒸之成燒酒率雜

種之明年并菜豆俱收總呼爲春花播菜豆麥訖勤者治田塍不惟便於擔泥壅稻亦以一切損苗之蟲生子每窟於其內故歲於農隙剗削草根另添新土誠殺蟲護苗之良法也老農云禾歷三時故稈三節三時氣足則穫自厚吾鄉種田例在夏至前後所歷二時而已計惟下秧極早可補事力之不逮穀雨浸種立夏前下穀稍備春氣至插青之日秧老而苗易長且耐風日古云秧好半年田非謂是歟嗣是而插青而耘盪訖於穫稻其間人事節次歲以爲常 張履祥補農書凡農器不可不完好不可不多備以防忙時意外之需糞桶尤甚諸項繩索及蓑箬斧鋸竹木之類田家一闕廢工失時往往因小害大 沈彤震澤縣志無產者赴逐雇倩計歲

而受直者曰長工計時而受直者曰短工又有佃人之田以耕而還其租者曰租戶少隙則又計日而受直爲人傭作曰忙工〔朱國禎湧幢小品〕近年農夫日貴其直增四之一當由務農者少可慮可慮〔董恂南潯志稿〕邇來農人多舍本業而營分外以持強挾詐爲能春花懶於戽水久不復種田功亦鹵莽滅裂每入市則茶寮酒肆雜坐喧闐此習於遊惰之明驗要亦人心風俗之憂也〔溫鼎見聞偶錄〕粵逆平後戶口凋殘鎮之四鄉荒田計十之三乏人開墾汗萊滿目郡西山田荒曠尤多溫台人及湖北人咸來佔耕自同治至光緒初年湖北人蔓延郡東凡一圩中無主荒田無不佔踞耕種搭蓋草棚每圩被佔者不下數十百畝秋收僅錢糧數百

文向之業主不敢顧問且性情狠戾欺壓土著強取芸蔬借用農器時多口角地保圩甲亦畏之如虎潯之四柵沿鄉均有棚民卽本地戶口繁盛亦恐未能使客還主近雖設有客民委員編立戶冊門牌稍示約束然主客之間終未能相安無事也〔又〕農人日卽偷惰新穀登場不聞從事於春花前志所載田中起稜播種菜麥今皆無有惟隴畔桑下蒔種蠶豆吾鎮所轄十二莊大率如此春郊閒眺絕無麥秀花黃之象近市之黠農專務時鮮蔬瓜逢時售食利市三倍近來佃農輸田主租額不過六七斗頑田或僅輸三四斗不敷納糧同光以來有力之家以田爲累不敢置買惟居鄉之富戶放加一錢放轉斗米則佃農不敢頑疲耳

施國祁居之東鄉有老人年七十餘嘗過予閒談蓋隱於農者也然少不澤于詩書得自天性其論說頗中肯綮亦奇矣因爲五詩以述其意農子恆爲農才名天所忌生兒拄門戶姓字麤當記兒年已勝衣會就村師肄三載省仿帖約略得筆意急呼兒勿往改裝穿犢鼻阿父今老大薰葳正不易荷鋤替耶耕田園將汝寄村師訝見勸小子實偉器何不與卒業青紫非難事俯首謝先生敦勸誠古誼不見東家子少慧頗聰異晚爲儒冠誤素業竟淪棄西鄰賣菜翁眈眈盡勞勸蠶桑利三倍多金買田地力田久無科司命豈余畀或聞秀才家未必知書義敢教兒負心貪天幸非冀富貴不長保所願子孫賢力耕生計拙飽暝

得天憐東頭膏腴產祖父假種田帑金論估值豪奪占利權當其全盛日北陌連南阡禾疇塞關右竹畝封渭川稅率巨量收坐入累萬千催租來悍僕中人見笞鞭貴家不旋踵籍沒爲賊園富家不轉瞬揮手當博錢華侈今安在飄忽如雲煙而我佃田者曝背日高眠瓦盆可酌酒敗絮聊遮肩祖父不長世及身方盛年顛倒十易主貿鬻多變遷桑海成小劫咄咄豈關天多藏而速亡倚伏理自然聞昔渠田廢越人供稍入矧茲泥塗鄉水芸利卑濕嗟嗟水芸苦夏畦病堪泣秧抽草復長荼蓼徧原隰非無迫地罇延蔓破艱澁非無燒薙湯深根錮潛蟄摧拉盡陳荻惟賴厥指十抉剔糞壤中膝屈不得立炎日赫如火遮頭一

小笠新苗利若刀掩脛一破褶淤暑塞溝塍斷續氣吁吸  
有時中毒虺血流和汗汁歸來頭搶地面槁色於邑庶幸  
稻有秋輸租食餘粒我農二生計命薄太危急漢廷水火  
詔此語未傳習陸氏耒耜經此事或搜輯 馮煖能市義  
高風卓已邁居貧到立錐大苦是逋債慨我農家流往往  
中機械劑券論手實取攜意頗快錢多市魚肉侈味捐蔥  
薤牀頭一揮盡始覺天地隘生涯太局促計窮烏翮鍛畏  
見催租客低眉受睚眦富人心計精科掠算纖芥薄儲倍  
稱息那足供鬱暝前年籽軸空今年兒女賣剝肉爲醫瘡  
吁嗟甚矣憊終老效梁傭無家可救敗莫謂尋常有小毒  
等蜂蠆三村出大戶十室久遭壞願言稱貸者休忘前車

戒 木棉古貝草繭實抽細纒烏涇始移植海墾稱奧區  
詎意崖州種流傳徧三吳鳴蟲乍驚懶責功問妻孥大婦  
頗能力拵彈操弦弧小婦復習勤紡車轉轆轤機杼誰者  
工堂上煩阿姑晨妝不暇理髮亂如蓬枯凍手不暇洗或  
生皸裂膚三冬勤夜作同巷戒偷懦計日成丈匹抱買權  
青蚨去歲實窘迫翦落償官租今年差可保鹽鼓或可需  
餘布尙尋丈爲夫作新襦農家重蠶績業此從古無疇將  
南村攷補題松雪圖

金桂演青苗劇有感良苗青青不盈尺鄉毗掠錢大作劇  
崇臺可建五丈旗恰對神祠樹欄柵提攜婦孺召戚友笑  
語喧闐走昕夕餅糧不足供粥餽稱貸歸來強宴客前年

霖雨浸阡陌一村十室無九宅去年鳩鵲紛中途餓死人  
猶滿溝壑今年民氣稍蘇息乍歛遊魂復其魄三春戶戶  
有新絲四月家家吃新麥蝗蝻屏跡旱潦勻眼見黍稌唾  
手穫民貧易擾富易奢雀鼠翻輸禦寒積嗚呼承平日久  
法變新司農方算折稅緡爾曹乃賽青苗神

揀種穀

許旦復農事幼聞嘉禾登場之後取穀之圓綻飽滿  
者留爲來歲之種穀有稈有糯有秠之中又有赤稻白稻  
之分赤先熟白較後秠稻我湖山鄉爲多下鄉甚少其熟較  
早一月俗所稱黃秠也糯稻我鄉種不甚佳未能粒粒通變  
惟金壇溧陽所出爲最穀既揀淨編稻草爲畚懸之梁間取  
其風燥不霉壞也大抵田一畝需穀種四升

墾冬田

農事幼聞耕田之具曰鐵搭有四齒長尺齒末闊者  
以墾田齒末尖者以蒔地有作偃月形者以鋤草冬月刈稻  
後卽將田墾轉以深爲貴至來春二三月重加翻努謂之鈔  
田總欲其土塊細碎得水融和也有冬不及墾直至插秧時  
爬轉者曰筴帚田以稻本尙留也雖已墾而未加鈔者曰鏤  
蓋田以土片大如鍋蓋也此惰農所爲良農斷不出此雙  
林鎮志至若得種春花之田菜麥旣收翻平溝稜而細削之  
謂之折麥稜此固人工之周到亦雨水之順調也

種春花

農事幼聞油菜小麥謂之春花自吳郡以東地高種  
麥爲多我鄉窪下種菜爲宜刈稻之後墾田爲高稜旁界小  
溝或撒麥令自出或栽麥苗若菜則必取秧培種種後俟其

南澤志

卷三十 農桑一

生發用包鐵木鏟再濬其溝卽以土壅菜麥旁一取溝深雖乾不致大傷一取溝底泥肥也然必春雨不多得以頻加厚糞結實始繁 [烏青鎮志]歲旣穫卽播菜麥春中則摘菜臺以爲蔬仲夏春菜子以爲油刈菜其以爲薪磨麥穗以爲麵雜以蠶豆並名曰春熟 [邢典書城雜著]麥種須揀成實者棉子油拌過則無蟲而耐旱宜肥地土欲細溝欲深種欲勻喜糞春間鋤一徧收子多若三春有雨入夏時有微風此大有之年也初種忌戌日以灰糞拌種妙 [補農書]農叟有言麥歷四時故稈四節種麥必使四時氣足則收成厚吾鄉種麥多在立冬後至夏至而收所歷三時而已中秋前下麥子於高地穫稻畢移秧於田使備秋氣雖遇霖雨妨場功過小雪以種無傷也

收春花

[農事幼聞]菜麥之熟在四月底正蠶忙時每未暇及此然梅雨將來稍遲恐不及刈矣諺云打稻奪麥甚言以速爲貴也收菜卽就田中拔起以大桶擲取其子若攜歸至家則殼燥子裂遺棄滿路矣麥則刈取後就家中曬乾築取其粒或陰雨連旬麥未乾透則生小黃虻顆粒每至霉變 [書城雜著]麥熟時帶青割一半合熟割一半蓋麥熟同時不比別田熟有先後若候齊熟一遇風雨必致拋撒卽載歸曬乾恐生蛾密密苦蓋以防雨不及載則坡下苦之乘晴明旋刈旋打揚籽粒收起卽未淨俟所收打過將稽再打 [補農書]油菜防盜取以牛糞入潭作爛澆之則菜臭而人不偷矣

浸種 書城雜著早稻清明節前浸晚稻穀雨前後浸用稻草包裹一斗或二三斗投於池塘水內缸內亦可晝浸夜收不用長流水難得生芽若未出用草舍之浸三四日微見白芽如鍼尖大取出陰乾密撒田內糯稻出秧較遲浸八九日如前微見白芽方可種撒時必晴明則苗易豎田須犁耙三四徧青草或糞穰灰土厚鋪于內舍爛打平撒種肥而易旺

撒秧穀 農事幼聞秧田必自爲一區四圍護以高塍或桑地梅雨驟溢可以屛乾無損若一浸入水中則田圩縱能車救而秧種已無有矣始撒須微水將田犁平如鏡穀種勻糝其上隨加稻灰頻頻灑以薄糞其初出細如鍼所謂秧鍼也長及尺便可取種矣

董恂播穀樹頭催耕鳴東作又相促邠風詳農事其始重播穀譬如吾儒行端在慎初服力不墮始基逮秋乃成熟無使雜穉稗良莠恐同蹙不辭選擇勞佳種辨種稂散置方罫閒四布如星簇雨露十月滋短鍼排一綠插需秧扇開霑體更塗足何待病夏畦卽此已顛匐吾儕食於人飽食未知福請共操豚蹄滿篝替渠祝

貸米 紀磊沈眉壽震澤鎮志耕時貸米於富戶至冬償以米其息甚昂有一石償二石者謂之轉斗米

董蠡舟潯溪棹歌販米商船邪許呼年豐價尙貴如珠火

船儲粟嗟餅罄貸得豪家轉斗無 船尾炊爨處俗謂之火船

董恂潯溪棹歌米憑轉斗接青黃加一錢多幸已償二月

農桑一

新絲五月穀爲誰辛苦爲誰忙

插秧 農事幼聞芒種爲插秧之候其率先者謂之開圩旱則上水澇則出水水以尺爲度不令過滿將前時已墾且鈔之田又用鐵鍬細細斫碎令全無塊壤然後下秧必界以繩謂之秧界繩每一界爲一垵垵約廣三尺種秧六窠層層相次每層前後約空八寸謂之段下秧之人須步步倒退腳踏段中空處不令插秧處有高低淺深庶秧得均勻分布垵之多寡視田之廣狹分段布秧太密不得亦太疏不得密則慮秋後熱傷疏則地有遺利也 爲青文獻拔秧洗根去泥揀出稗草趁天陰晴急忙蒔插稗行宜直以便耘揚淺插則易發稗與秧宜辨葉上光滑色微黑者爲稗葉有鋒芒色微黃者

爲秧 漣川沈氏農書種田不在乎早本處土薄早種恐生蟲其時有水則芒種前後插蒔爲上若早年車水便到夏至也不妨只要倒平田底停當生活以候雨到雨不到則車種須一日車水次日削平田底第三日插秧使土中熱氣散盡後無出蛀之患而墊底尤爲緊要墊底多則雖遇水大而苗肯參長浮而不至湮沒遇早年雖種遲易於發作平底之時有草須淨盡如削倘種時先有宿草得肥驟興秧未活而草已滿拔甚費力若插時拔草先淨則草少工省 又湖州水鄉每多水患嘗見沒後復種秧俱大收穫比前倍好萬一遭此須設法早車買苗速種立秋前可種若遇天氣老晴熱氣尙盛便過立秋幾日尙可種種下只要無草不可多做生活



尤不可下壅下壅工多則苗貪肥長枝枝多穗晚有稻無穀戒之

〔方叢插秧〕霉風吹平疇霉雨時飄忽蠶桑幸已了插種因時急努力早開畦丁男趨遠陌縛秧如束薪插秧如拱揖俯首躬復偃退縮踵相接布置龜手披芋繇雁行列疏密縱橫間一一從繩直豈不惜辛勤時哉不可失伊始不竭蹶那望秋秀實有年良在茲勉勤栽植

撩草場田 〔農事幼聞〕插秧後月餘草生苗旁以手撈取其草即搓成團踏田間取其爛而滋益苗根也撩草之度或一次或二三次總視草之多少為斷此後則場田矣場吐浪切或用盪字俗作非揚杷之制板長尺半首廣二寸末廣三寸板下勻排鐵釘

五層作微彎似鉤勢上裝竹竿抽曳往來于苗之空段間令草根盡起不致復生

耘田 〔農事幼聞〕場田就空段間抽曳之而每層六窠之中間或生細草則場所不及也故又加以耘之功耘者膝跪行於苗間兩手匍匐而前細剔苗根之草慮苗葉傷其跨編竹片為簾縛兩股間謂之耘田馬蓋場則橫推耘則直搯一縱一橫事交濟而功遞密也然場立而耘跪又當三伏烈日中農夫勞悴無過斯時 〔沈氏農書〕今日拔草明日即要橫鋤當使草常無處著腳計小暑後至立秋不過三十餘日鋤盪耘四番生活鋤一盪二耘一盪均勻排定立秋邊或盪乾或耘乾必要田乾縫裂則根脈深遠苗榦蒼老結秀成實水旱不能為患矣

乾在立秋前便多乾幾日不妨乾在立秋後纔裂縫便要車水蓋處暑正做胎斷斷不可缺水水少卽車直至斫稻方止若值天氣驟寒霜早凡田中有水霜不損稻無水之田稻卽秕矣〔書城雜著〕揚稻後將灰糞或麻豆餅屑撒田內用水耘去草盡淨近秋放水將田泥塗光謂之熯稻待土裂車水浸灌之謂之還水穀成熟方可去水或遇天少雨急鋤一徧勿令開裂俟天興雲則澆肥糞待雨勿致缺水則稻發不遏〔紀端耘田歎〕所居在村南田間去數武閒從讀書暇溫詞叩田父田父前來言耕田耘最苦日曬背欲皺蟲齧血成乳蹲身苗葉中氣咽不得吐微風搖綠涼其銛能割股苗草不兩立草勢強如弩一耘還再耘尙嫌功莽鹵竹馬將

壁懸培壅自此甫去年水旱時六月無滴雨今年雨如澆水深魚可罟昨夜湘江船餅價等于土余家亦世農舊有農桑譜不聞田父言那悉苦難數胡爲今之人還賤穀之五

下壅〔農事幼聞〕草旣淨後加以肥澤之功謂之下壅富家多用豆餅椎碎成屑勻撒苗間貧家力不能致餅則用豬羊欄中腐草當暑天臭穢不可近將桶貯之挂於項下胸前兩手撈取分擲周行田間必勻必徧或有捲取水草作爛成泥更有用蠶糞灰糞者他處山田水冷則用石灰亦有用馬牛犬豕骨豬毛雞毛及頭髮者土性不同不必以之繩吾鄉也〔徐獻忠吳興掌故集〕下糞不可太早太早而後力不接交秋

多縮而不秀初種時必以河泥作底其力雖慢而長伏暑時

稍下灰或菜餅其力亦慢而不迅疾立秋後交處暑始下大

肥壅則其力倍而穗長矣〔烏青鎮志〕下接力都在處暑後

做胎及色正黃之時倘苗茂密度其力短俟抽穗之後每畝

下餅三斗以接其力亦有未黃先下者每致有好苗而無好

稻〔震澤縣志〕在昔餅之直賤計其費率與藁相當今餅直

視前日增藁之直不能與之相當故農人益苦按今稻草價亦日昂蓋由於此於

〔張海珊說糞〕溫也癡以擔糞圖屬題因作此凡田有厚薄土有肥磽皆緣

糞氣為美惡糞以柔之無彊槩糞以壅之無輕輿薄使厚

過使和糞之利益宏哉凡糞載於周禮雜見於諸家種植

之書糞之類或以馬骨牛羊豬麋鹿或以禽獸毛羽或以

腐稔以敗葉以枯朽根莖或以繅蛹汁以溝瀆泥或以人

洩及牛豕洩其類猥以蹟凡人洩為大糞餘為雜糞苗糞

為蠶豆為大麥草糞為翹蕘陵苕為苜蓿為苔華江南水

田冷宜火糞江淮迤北宜苗糞凡制糞多術有蹋糞法有

窖糞法有蒸法有釀法有煨有煮而煮尚矣凡置糞處或

為池或為廁懼其露也為之屋懼其滲也為之甌檻凡用

糞有時與法用之未種先曰墊底用之既種後曰接力不

得其時與其法則枝葉茂而實不繁糞過多則峻熱而殺

物凡糞具有畚有帚有杓有瓢杯載糞有划船有下

澤車凡糞蟲有蟪有蛭蛻

車水 農事幼聞水車之制絕大者用牛牽盤以運軸或三四人立而踏轉之更有用風帆以轉軸者其小者則一人坐而手搖之吾鄉並不經見吾鄉之車兩人坐而踏轉之最為適中車用方木長二丈餘下排短檔二十四以連屬車牆亦曰車箱兩牆相去約廣尺深八寸中用鶴膝銜接為轉捩間以木片謂之車柿音柿柿之廣與長視車牆車尾有小軸車前橫大軸軸有齒十二鶴膝貫於軸上隨軸轉動挈水若建瓴誠旱澇之利賴也早年上水人各自為主澇年出水則合圩其舉謂之大翻車車之多少視圩之大小備車之人辦糧佔地曰車埠頭分眾戶田畝以屬之每舉工六日為一程喚所屬者到工遲誤則有罰當緊急之時軸頭置紡綫以記轉數番數小

軸上聯以繩以較彼此遲速彼繩屢為此絞斷則彼宜有罰罰以酒其有外圩人來者放重其車每以此侮之亦一敝俗也

孫熨桔槔行工人製器何奇絕輪轉水中使水逆軟浪千層欲上梯白光一道如翻雪中田土燥苗半槁赤日行天午更熱農人雙腳踏轆轤絕勝溪濱一鉞挈有機事者有機心漢陰丈人誚其譎豈知利用本前民不爾禾苗那可活俯仰全憑人力引勞苦何如牛服軛只愁百畝地皮焦難顧千夫脛骨折收得盤中米一粒農夫汗費幾升滴舉頭望雨雨不來夜半猶聞聲軋軋

除蟲 農事幼聞三伏苗長之時有青翼蟲生其間形細如粟

而頭尖謂之蠨蟲多則令苗悴除之之法菜油熬過用小竹管吸油滴田間一人從後用竹板打油水上苗蟲聞油氣則死秋熱過甚或兼毒霧連朝則生黃翼小蠅遺子苗本上卽生蛀稈蟲能食苗使倭除之之法用缸貯水置田塍夜炷火其中蠅望火光撲入卽渰死庶杜其生子之患總之苗喜透風有風處蟲口較少道光二十三年我鄉曾遭此患竟有通畝枯稈無升斗收成者惟沿塘透風處得無恙若蝗蝻爲蝦子所化漫空蔽野絕無備禦之策惟祝天連日霖雨則此蟲殼不得脫溼漲而死矣

陳芳生捕蝗考飛蝗見樹木成行或旌旗森列每翔而不下農家多用長竿挂紅衣白裙羣逐之又畏金聲砲聲聞之遠舉用稈草灰石灰等分細末篩羅

禾上蝗卽不食蝗最難死初生如蟻之時用舊皮鞵底蹲地搗搭應手而斃且狹小不損傷苗種蝗在麥田禾稼深草中者每日侵晨盡聚草梢食露體重不能飛躍宜用笮箕拷栳之屬左右抄掠傾入布袋蒸焙炮煮隨便或掘坑焚火傾入其中若只瘞埋隔宿多能穴地而出蝗有在光地者宜掘坑於前長闊爲佳兩傍用板及門扇接連八字排列集眾發喊推門趕逐入坑又於對坑用埽帚十數把見其跳躍而上者盡行埽入覆以乾草發火焚之然其下終是不死須以土壓之過宿方死陳龍正曰蝗可和野菜煮食見於范仲淹疏又曝乾可代蝦米然西北人肯食東南人不肯食亦以水區被蝗時少不習見聞故耳崇禎辛巳嘉湖旱蝗鄉民捕蝗飼鴨

極易肥大又山中人畜豬不能買食試以蝗飼之其豬初重二十斤旬日肥大至五十餘斤志稿澇年穫稻過遲每爲野鴨所食千百成羣所下之處稻頭一霎而盡亦以金聲砲聲驅之

刈稻 農事幼聞刈稻早或九月底遲亦不出十月蓋禾稼之成資乎霜露霜太早則粒不能實霜未至則稈不得枯故必俟霜降之後其所持以刈者曰稻鐸刈稻乾田爲易溼田爲難既刈後將稻橫臥於四柱木棧上以便紮縛成箇名曰漣車既成箇分張於三肘竹架上名曰翹籬亦作喬杆風戾日炙乾後乃任負以歸東鄉田高無須竹架竟置禾田中亦能趨燥我鄉則非此不可

孫燮刈稻行金風一夜吹郊墟旦日刈稻人爭趨祝融肆威奪民食努力斂此枯槁餘去年刈稻稻滿屋今年刈稻僅數斛卻喜官糧尙可供餘粒那能飽饘粥簸之揚之如汰沙穀中莠稗何其多劣米上倉不中式卒逢吏怒當奈何朝廷卹災吏橐滿富民出錢征可緩揀選好米輸官倉偏是貧家田耐旱

牽礮 農事幼聞打稻用木牀竹棧兩手舉而擲之穀自纍纍而下旋用風車扇去其芒芒謂之穩亦有用圻者取和灰泥以塗牆則經久不裂穀既扇淨乃就礮礮以堅木爲之上圈鑿直齒下畔鑿橫斜之齒令上下齒相齟齬礮上搭直檔曰大桁旁加橫檔曰小桁四五人扶其檔而牽曳之穀自脫而

米不傷其殼謂之礱糠再用風車扇去礱糠間有碎粒曰糙  
糶亦扇去之然後入大篩以篩之初上直落篩後上圪篩總  
以米淨穀除爲高手第一番所出之米謂之頭鋪米篩後重  
上礱者謂之二鋪米並以自食及糶錢并以償轉斗米最後  
所出多零星碎雜青腰白臍之屬謂之結礱末鋪佃戶完租  
大率皆是物也

上囤 農事幼聞春米之器或用木曰或用窰曰而窰曰爲勝  
其用石曰兩人舉石杵雙確者西鄉間有之我鄉無有也木  
爲曰牀牀上有杵曰曰筆亦曰曰跳足踏以春米白則以小  
篩去其糠糶或一春卽止謂之大一礱或篩後再春則米愈  
白淨謂之雙糙他處有三糙四糙者亦吾鄉所無也繼乃紫

稻草爲圈每圈高約二尺層疊增高名曰囤先用菜葉麩皮  
裹以稻草紮縛成團高數尺植立囤心曰發頭然後將米入  
囤旬日後發頭蒸熱溼氣上冲急用礱糠隔麻布腳袱以收  
之隨溼隨換務收盡其溼而後止則米黃白停勻不霉不蠹  
所謂冬春米也至山鄉秬米則蒸穀而礱之蘇松等處則徑  
食白米並不用上囤與吾鄉不同 志稿有用石灰燒酒滾  
水入發頭內則一二日卽蒸熱數日卽開囤名曰發極冬春  
倘開囤稍遲米卽黑爛市肆每用以攬入冬春礱之 鄭元  
慶湖錄蒸炒米與冬春黃米皆取其脹耳嗚呼吾鄉人豈樂  
爲此哉農夫終日勤動朝饔夕殮若用白粲須得二升猶不  
足以果其腹故不得已而爲之計冬春蒸炒日食升許足矣

明知自欺以儉其口腹土瘠民貧吾鄉爲甚上而杭紹下而蘇松皆不然也

紀端春米謠茅舍鷄鳴聲未絕踏凍呵冰行似斃三竿日出主人眠鐵鎖重開寒氣冽朋儕絡繹步確連雷電訇然半空徹汗雨翻成六月天毛孔溼盡淋漓血竹籃冷放午間糧黃莖鹽齏焦飯咽長槍箭子不記名九轉筵勻浮白雪杵成憑取小紅籌南陌西阡各異轍晴月吳歌犬吠歸黃昏風雨煤燈滅入倉收蓋價當酬主人嗇吝青蚨折寄語東家紈袴郎食時五觀涪翁揭

董恂春米謠鉤鏞已歇耒板鳴吹來耳畔多春聲穀皮簸蹂飛作蠱穀實潔白精華呈甕儲計穀一年食餘以釀酒

來稱觥我雖無田不耕作一餐也費千香秬去年歲歉不得米今年盼得糠星明春歌自朝達夜半倉箱料得多粢盛記曾讀易攷厥制斲木掘地勞蒼氓今易以瓦較便利沈郎捉搦歌堪賡有言赤冀始作此或穀或糲當持平春揄之說出大雅春人亦列周官名春成曰糲否曰糲一般免我饑腸撐弟兄能容亦斗粟那須稗繫求其精我歌未終曲人有嘲儒生道儂飽食太平飯只解軟語歌嚶嚶君知春者樂不識春者情一田所出米有幾其半輸卻官家征外此私債償敢冀留餘贏嗷嗷俯仰間日暮無朝烹古人之樂以歲卒今人拊擋多拘俸倘得歲云熟民物猶咸亨自逢洪水災呼癸還呼庚棉衣脫卻質庫去一身博得



饑寒并宿逋未了又新券補瘡剝肉難兼營今年縱得春  
 春罷還怛怛一朝催租來益益俱為傾那有升斗儲可以  
 言豐盈不然捉郤官裏去蒲鞭一一飛黃荆我聞斯語悲  
 不覺心為驚無米不飽有亦同噓饑郤不關西成女貧苦  
 為他人嫁男貧亦為他人耕可憐童子鴻賃庶愁回縈娣  
 親己乏伯夷粟遺母復少君子羹硯田食破不得飽糝糠  
 意氣空縱橫請停春者相聽我歌淒清不必垂紳侍享佩  
 白珩亦不必鳴鐘列鼎開千羹但願家家十斛收自多喧  
 春不斷聲鏗鏗稻堆已比屋更上糠積亦將山與爭君不  
 見昔日越王春米處糠頭留得勢峻崢

完租

志稿江南完租並佃戶送至業主之家吾鄉無此例必

業主乘舟至鄉量取至豐之年每畝不過一石左右稍歉即

減有僅三四斗者又或歉歲緩征官不開倉則租無顆粒然

漕糧分三年帶征而租米不收永無帶征之事也 烏青鎮

志賃田以耕之佃戶向時人尚謹愿除實租外照田根立券者曰虛租有

預議折實米數不論水旱者為實租視豐歉為盈縮年來姦滑成風順成之歲

且圖短少小涉旱澇動輒連圩結甲私議納數或演劇以齊

眾心或立券以為信約偵有溢額者黠者遂羣噪其家責以

抗眾不則陰中以禍是 國家以旱澇為憂而姦佃反因以

為利也懲難此風則公私並受其福矣 吳興掌故集湖中

收租斛視常有加至三升者其俗大率收租極大納稅名官

斛糶冬米極小習俗已成不以為異見夷堅志載湖州沈二

入用大斗量租爲陰司所錄其理或有之然則亦可警矣其間豈無公平識達之士變易其風者乎

趙蔡溫氏母訓跋錄陸太夫人言買田收租是儒家捷徑良方不廢清修不染市道以今日論之則業主佃戶莫不以狙詐相尙實與市道無異而清修亦斷不能無損此誠陸太夫人所不及料而余則深有感於人心風俗之遷流矣

施國祁收租卽事日斜阻村西勢面嚴風酷投止南榮下寒氣誰囑疇田父有好懷泥飲招近局甕頭杜茅柴味澁勝醞醪何以侑吾觴薑紅間薑綠充腹得芋魁滿盤堆紫玉情親失行次被肘膝屢促更呼舟子來分炙色亦欲饑

走體不溫頓令噓春旭人生奚必爾一飽萬事足 破屋稀煙爨寒鄰少雞狗所遇非丁男惛惛倚孀婦緼縻行百結懸鶉不覺醜見我入門來苦語何噓噓耳熟故夫言君家多積負甕米瓊之粒量入聚于斗惻然顧荒廚甌乏數升糗薄藏其餘幾拾橡不救口折券古非難虐取天所培錯莫一長吁揮袖出門走那得糜暖場爲渠租數畝

董恂村田詞又爲登高把一樽追呼聞已急前村儂家只有租田在不怕如狼吏打門

蠶事總論 胡承謀湖州府志治蠶始於護種終於收繭繅絲而中間時寒煥慎燥濕節饑飽視慈母之護嬰兒殆有甚焉而其所賴者專在于桑其樹桑也自牆下檐隙以暨田之畔

池之上雖惰農無棄地者其名桑也不曰桑而直曰葉其有餘則賣不足則買胥謂之稍葉稍有現有賒其不能者或典衣鬻釵釧以償之或稱貸而益之或其時蠶多葉少而無可稍者則不得已屑米粉糝葉以飼之採柘葉以充之然且饑飽之不節燥溼之不均寒煥之不時則蠶往往至於病而死而蛇鼠之耗蠅蚊之毒乘間抵隙每爲人力所不及防蓋有功敗于垂成禍生於非望者又不可勝數矣 湧幢小品凡蠶之性喜溫和與惡寒熱大寒則悶而加火太熱疏而受風蠶房宜卑卑則溫蠶簇宜高高則爽又其收種時須在清明後穀雨前大起須在立夏前過此不宜也至於桑葉尤宜乾而忌溼少則布浥之多則箔晞之能節其寒煥時其饑飽調

其氣息常使先不踰時後不失期而舉得其宜故所收率倍常數 〔又〕湖之畜蠶者多自栽桑不則豫租別姓之桑俗曰紗葉凡蠶一斤用葉百六十斤紗者先期約用銀四錢既收而償者約用五錢再加雜費五分蠶佳者用二十日辛苦收絲可售銀一兩餘爲繇爲綫矢可糞田皆資民家切用此農桑爲國根本民之命脈也本地葉不足又販於桐鄉洞庭價隨時高下倏忽懸絕諺云仙人難斷葉價故栽與紗最爲穩當不者謂之看空頭蠶有天幸者往往趣之 〔沈氏農書〕蠶房固宜邃密尤宜疏爽晴天北風切宜開窗牖以通風日以舒鬱氣下用地板者最佳否則用蘆席墊鋪使溼不上行四壁用草簣圍襯收潮溼大寒則重幃障之別用火缸取火氣

以解寒唯暴熱則外逼內蒸暑熱無所歸則蠶身受之或體  
換不時喂飼略後受病之源皆在於此 沈鍊廣蠶桑說蠶

最爲鼠所喜食育蠶者不可無貓 補農書蠶之生疾半在

人半在天人之失恆於惰惰則失飼而蠶饑饑則首亮失替  
而蠶熱熱則體焦皆不稔之徵也天之患恆於風雨霧露卽  
烈日亦有不宣以乾鮮之葉難得也蠶食熱葉則繭浮鬆不  
可絲其害淺食溼葉則潰死食溼熱葉則僵死食霧露葉則  
痿死葉染風沙則不食葉宿則不食而仍饑其害深知戒人  
之失而不知備天之患未爲全策也 談鑰吳興志湖絲雖

徧天下而湖民身無一縷可慨 董蠡舟南潯蠶桑樂府自

序蠶事吾湖獨盛一郡之中尤以南潯爲甲然護養之方早

晚之候與夫器具名物禁忌稱謂有與郡中不同者不特如  
秦少游所云寃地異於吳中而已也 陳根培湖陰清話古

書稱蠶三眠三起農桑直說謂四眠蠶別是一種今湖俗多  
養四眠者轉謂三眠爲別種矣 溫鼎見聞偶錄亂後鄉人

惰於稼而勤於蠶無不桑之地無不蠶之家然桑葉雖較前  
有加而飼蠶仍虞不足遇葉貴有棄蠶於水者原其畜蠶之  
多以售絲易而絲價昂也邇來洋商購經居其半潯地業絲  
兼經行者爲多經之名有大經有絞經有花車經等名凡做  
經之絲必條紋光潔價亦勝常故鄉人繅絲之法日漸講究  
此外又有縑絲廠收繭作絲不縑絲可售繭無錫紹興率皆  
售繭我潯則無不售絲者而繭絲吐絲頭潯花繭黃滯頭等

均可售與洋商鄉人費一月之功苟得豐收一年取給於此然而捷獲則日事奢靡故蠶絲之利雖豐而仍無補於民也

〔丁蟾哀蠶行〕白蒿繁時桑葉青吳下蠕蠕蠶子生獨居少婦抱兒睡遙天不曙神魂驚采桑采桑幾勞頓三浴三眠長積寸阿儂哺蠶如哺兒以蠶爲命豈辭困黃土牆邊幾本桑蠶桑立命給租糧阿夫栽時勤灌溉阿儂采時不盈筐采桑一筐良不易哺蠶數堰寧有濟蠶饑漸漸黑瘦多繞筐躑躅空泣涕鄰家摘繭繅新絲阿儂蠶務竟如斯哺兒無心活無計懷中之雛饑而啼兒幼長與儂相近儂貧長以蠶爲命今年蠶荒難存活宛轉攜兒水中殉塵堆舊時紅錦機夫歸嗚咽無故妻幼穉嬌兒復何處生難聚首

死同歸吁嗟胥吏猛於虎窮廬追呼逼門戶吳絲藉以充官稅吳民蠶務多辛苦育蠶身殉悲難勝我聞爲作哀蠶行長歎一聲出隴望桑葉黃落鳩哀鳴

〔紀松蠶婦怨〕出門采桑桑入門飼蠶忙桃花已落盡夏景日漸長家家試新火戶戶早凝妝有郎不同宿有酒不能嘗中宵頻起看攬衣獨傍皇吁嗟乎辛苦倍更長初眠蠶在房再眠蠶在堂三眠蠶欲老纍纍繭盈筐雖則繭盈筐焉得遂成章五日繅爲絲十日織爲錦杼機夜雨寒刀尺秋風緊雙眼花雙手抵千辛萬苦一絲絲來朝剪取攔街賣賣向花街遊冶兒遊冶兒嬌且癡子無袴妻無衣楊柳隄邊楓橋月換得紅顏一解頤

〔金錫桂養蠶詞〕棠梨花白斑鳩鳴黃塵跣跋提籠行晴窗  
 急作風雨響紅蠶食葉沙沙聲江南四月蠶正熟東家西  
 家閉茅屋車蓋童童橫短幅沙暖溪頭臥黃犢 小艇激  
 流聞打槳彷彿今朝葉價長銀釵女兒頭不梳歷亂飛蓬  
 垂兩頰女兒不愁一月忙只愁無葉饑蠶僵蘆簾垂垂春  
 晝長誰家煮繭門前香

〔溫文禾蠶詞〕卸了山棚待做絲黃昏剝繭共相期隔牆笑  
 語聲多少知是鄰家好女兒 幾日縑絲繭已完猶餘種  
 繭滿筐攤今宵定有蛾兒出笑喚檀郎把燭看

〔曹仁虎潯溪竹枝詞〕紅蠶上簇四眠過金繭成來欲化蛾  
 聽道今年絲價好通津橋外販船多

〔董兆驥蠶月卽事〕清明纔過聽提壺浴種家家計有無拈  
 取柔桑心自忖今年把火是三姑 微行詰曲約朋儕笑  
 倚桑枝納繡鞦采得滿籠猶獨立忽因公子動春懷 青  
 桑買罷急忙歸飼得蠶饑自忍饑幾兩新絲猶未卜先教  
 典卻舊棉衣 新絲縑罷合家歡誰料心頭肉已剝富戶  
 莫來催米債硃籤卯上欲完官

〔施國祁雜興〕佛祠可有社錢供香火頑僧性最慵蠶事莫  
 嫌無用處三更來打及時鐘 僧於蠶月入夜打鐘三次以  
 警蠶婦餉葉之候蠶畢率酬  
 絲以

〔張鑑蠶詞〕種來女樹亞紅牆露葉煙條未滿筐知是馬頭  
 孃祭否應無打鼓洒桃漿 火速門攤徵大官浴川風戾

敢偷安祇將破袴憐夫壻難掩催租幾處癢 父蛾母蛹  
暖房餘雪色吳王繭不如誰信輪蹄日蕉萃郎騎秧馬妾  
縑車

〔李廷賡春蠶竹枝詞〕竟日東風陌上催催將桑眼一齊開  
鄉人預備收蠶事先買鵝毛幾對來 蠶子初生徧四鄰  
舊筐紙盡裱鮮明偶來親友猶相告未到三眠不忌人  
偷閒小立粉牆東十畝陰凝夕照空何處剪刀聲不斷一  
梯斜倚綠雲中 東鄰姊妹西鄰邀今日蠶眠第二朝待  
到晚來須送葉帮儂采葉過浮橋 夜半停燈夢未成脩  
脩響送耳邊清錯疑細雨篩窗紙恰是春蠶食葉聲 漸  
見飛揚欲起蓬照來頭腳已精通一時送考真忙煞幾箇

蠶孃髻尚蓬

頭腳通亮葉已不食即所謂考孃也

棚底燒殘獸炭紅山頭

偏欲透涼風吐絲未盡聲猶響着火須憑兩夜功 算到  
收成細雨紛幾籃繭子幾多斤一家婦女齊歡笑難得今  
年有十分 縑盆水沸氣糊塗翠袖飄揚半小姑一路閒  
行看煮繭車聲軋軋徧茅廚 皎潔疑鋪雪上花換湯叮  
囑袂頻遮絲頭偶爾沾紅色利市傳言到我家 盡欲收  
藏待價沽白絲抱去換青蚨鄉村四月窮人少眞箇黃金  
滿地鋪 一番辛苦儘堪當彼此相逢問訊忙蠶事既登  
人漸暇家家神賽馬頭孃

〔龐正達蠶月三禽言〕葉貴了心悄悄獨向儂家叫不了蠶  
饑不能啼人饑昏復曉典衣買葉衣無多箱空篋盡蠶仍

殍蠶房獨坐淚如珠淚珠漸多蠶漸少心悄悄葉貴了  
灼山看火蠶孃莫情天氣陰寒蠶易殍那能作繭如累卵  
帚頭柴把高峩峩更有蘆簾遮貼妥瓦盆蕪炭燄欲飛日  
夜山棚相對坐蠶孃莫情灼山看火 家家好過蠶孃相  
賀東鄰回山笑語喧西鄰剝繭人滿座今年收成十倍多  
添買絲車連夜作新絲剝取白如霜尙有同功如蠶大蠶  
孃相賀家家好過

屠澄初夏雜興綠榆低映水邊門菱葉萍花數漲痕茗雪  
風光誇四月縑絲聲遞一村村 做絲花落做絲忙盡日

南風麥弄黃村裏剪刀聲乍斷又看二葉綠牆桑

栽桑

烏青文獻畜蠶之家先在栽桑其蠶之也於冬之杪春

之初遠近負而至大者株以二釐長八尺所謂大種桑也密  
眼青亞之其栽也耨地而糞之截其枚謂之嫁留近本之條  
尺餘許深埋之出土也寸焉培而高之以泄水墨其癥或覆  
以螺殼或塗以蠟而封之是防梅雨之所浸糞其周圍使其  
根四達若直灌其本則蠶而死矣不可灌水灌以和水之糞  
二年而盛又必月一鋤焉其起翻也須尺許灌以純糞徧沃  
于桑之地使及于根之引者禁損其枝之奮者桑之下厥草  
不留遇午日不可以鉏其摘也必潔淨遂翦焉必于交湊處  
空其榦焉則來年條滋而葉厚其壅也以糞以蠶沙以稻草  
之灰以溝池之泥以肥土初春修去其枝之枯者樹之低小  
者其壓也春初以長枝攀下溼土則條爛燥土壓之則根生



其接也仲春擇桑大如臂者約去地二三尺以刀剔起樹皮取柔枝大如筋長一尺者削如馬耳插入皮中卽以桑皮纏定糞土包縛令不泄氣卽活爲桑之害也有桑牛尋其穴桐油抹之卽死 汪曰楨湖蠶述接桑本粗者可接細弱者不可接接後能得天晴二日第三日雖有細雨無害倘久晴縛處燥裂須用水潤其縛俟新條發芽將故條翦去便成家桑接而不活者可俟明春再接 烏青鎮志穉桑初種胥名桑秧其種也不外冬杪春中法貴稀縱橫各七尺冬種者秧宜大清明前後種者宜細桑必接而後大每以家桑枝接之不則爲野桑條桑貴翦初種翦其榦獨剩根而糞之令其發生如是三年而後留其榦採葉後又翦其長條否則葉不暢茂

其不翦者曰高桑翦而禿者曰斂推桑其修也擇根下細條或了襠陰枝以及渺小不堪蔭下繁密者悉去之翦桑又或有前因礙鋸而未及盡截及老枝不成器者再芟之設遇癰桑卽墾去勿令傳染蓋桑癰無治法也歲於清明時糞其四圍謂之撮桑翦畢卽灌之謂之謝桑其刮蠟也自冬訖春檢瞭凡三猶不能淨盡須六月捏頭蠟七月捏二蠟而頭蠟又宜細察留頭蠟一則二蠟百捉蛙亦須三次春分捉出屑蛙秋分捉條了蛙翦桑後或九月又細捉之恐因捉損桑則用爆仗藥綫入蛀穴燒之蟲卽死立夏後采桑質葉名葉市蠶有頭蠶二蠶故曰葉曰頭葉二葉云二葉須老農善採者留其條爲來歲生葉之地若頭葉則盡採大約良地一畝可得

葉干三四百斤 廣蠶桑說桑地宜高平不宜低溼高平處亦宜培土深厚 西吳蠶略以桑之喜疏也墾必數四深必尺餘以桑之喜肥也壅以蠶沙暨豆屑糞草以桑之惡沙礫草萊也植必平原芟必淨盡治地之道能順桑性故生葉蕃大而厚 書城雜著壓桑初芽時擇指大枝條旺相肥澤者就馬蹏處劈下潤土內開溝尺許埋實自然生根布葉壓後遇旱於旁開溝灌之但取水氣到忌多著水修桑削其小枝則葉茂去其枯枝則不荒蠶事畢將枝髡去但髡時不可留觜角及夏至開掘根下用糞或蠶沙培壅則生意鬱積來年嫩枝之葉更覺茂盛且皮可製紙枝可當柴兼有餘利 桑譜凡家桑栽種有年根深且多設欲移此置彼其起之種之

之法不可不備起時依桑枝四面蓋覆處墾開其土輕輕翻杷將樹緩緩取起勿令根斷種法如種野桑式用木梢作椿捆縛其本以防風動移種時春則二月中冬則十月中宜天晴以清水糞澆兩三徧其處一年不可墾動又不可剪動其枝葉

浴種滷種 西吳蠶略俗以臘月十二日爲蠶生日取清水一盂向蠶室方采枯桑葉數斤浸以浴種去其蛾溺毒氣也浴後於無煙通風房內晾乾忌挂於苧麻索上孕婦產婦皆不得浴 董開榮育蠶要旨種有二一曰鹽種繭細而堅 中有細頸名曰腰箍一曰灰種繭大而鬆臘月十二日浴之鹽用食鹽將種布置匾內鹽滲布上沒子爲度用濃茶一碗候冷噴之令溼

透放屋上及庭中經霜露七宿始收下如遇雨雪當早收刷去其鹽

灰用石灰每方尺許用糶子大一塊盛於瓷盆滾水泡化待

溫浸入曰殺種點綫香一枝香盡漑乾放匾內令經嚴寒凝

凍至醉司命日用蒸糶子湯待溫將種浸入亦以綫香為度

輕輕漑乾曬燥收藏鹽灰二種並同按是名漑種亦有用寒食日者廣蠶

桑說種所以必須醃者借鹹氣以殺其子之無力者耳不醃

者謂之淡種易病且不若鹽種之繭堅厚

董蠶舟浴蠶臘月取布種露置庭中一宿煎茶候冷浸之糶鹽或石灰於其上曰殺種至寒食蒸粉案

祀竈取蒸餘暖水采蠶蠶蠅豆等花共投其中浴之浴後

瞭乾曰漑種是日市門神貼之又以石灰畫地為弓弩形

以祛祟鄭元慶湖錄謂清明食螺謂之挑青以殼撒屋上謂之趕白虎亦以禳蠶祟吾鎮則無之隔歲招

搖指星紀農事告登蠶事始盡攜布種置中庭一宵露置

冰霜裏取潤還須茗汁醃灑以蜃灰糝以鹽田家一例鈕

非種先事全將醜類穢轉眼已過百五日老婦瓶盆羅滿

室粉資祀竈為祈蠶蒸來翠釜湯餘熱油薑豆莢花叢叢

摘取一握投湯中挹湯漑種令霑浥更借茅檐薄日烘搨

擋忽忽日過午何暇挑青禳白虎呼兒換卻舊門神還待

布灰畫作弩

董恂漑種嘉平二七良日逢以水浴種當去冬今年又到

清明夜俗呼寒食為清明夜浴蠶例與殘年同門神競向白板貼以

灰畫地如彎弓祈禳白虎辟蠶祟欲趨其吉先祛凶婦姑

忙忙不得暇磨米作糶虔且蒸蒸糶水香漑布上采摘花

片攪其中一年蠶計此初事能慎厥始斯有終深闈努力

促鍼拊拮据忙月無餘功

護種

育蠶要旨清明後穀雨前用舊絮包種六七日再將種放熱被內令得人氣漸漸溫暖其子變綠謂之戰色俟全綠即可收蠶倘桑葉萌芽未曾暢茂天忽驟熱宜將種放涼處使不戰色廣蠶桑說蠶子先出者謂之破紗有破紗須以燈草心數十莖勻鋪布上而摺之以防壓損

沈炳震蠶桑樂府護種林間春鳥啼布穀穀雨纔過蠶事促蠶房紙窗照眼明當戶春光快晴燠堂前老翁負朝陽室中新婦罷曉妝旋向牀頭理蠶種拂拭塵埃手自奉東家昨夜已打包西鄰擇吉聞今朝香羅包裹更重重束成置之薰籠中晏溫暖氣長融融阿翁晚睡抱當胸非關新

婦好安眠哺兒時復開胸前阿翁慎莫辭辛苦纈絲織絹先奉父

董蠶舟護種

浴後包種紙貼胸前得暖即活郡人以巾裹置熏籠上謂之打包亦吾鄉所無深林

曉聞布穀語屋角鳴鳩拂其羽微禽解報蠶候臨剛是今朝逢穀雨穀雨已過蟲難藏城中戶戶打包忙牀頭布種亟檢理護來趁此春宵長一層只隔香羅帕莫白切勝傍熏籠取餘熱明晨生意定全蘇溫馨氣借酥胸熨和服頻番掩復開嬌兒索乳數投懷枕邊低喚教郎醒今夜憑君抱護來

董恂護種東風吹破桑眼青穀雨已近天氣晴囑郎早詣

日者室遴選吉日宜收成儂家蠶種已浴過須令溫暖滋

初生只愁夫婿正年少心熱無乃多薰蒸不如阿翁齒衰  
邁微和微暖纔相應老人深夜醒尤易那須少睡頻叮嚀  
況是阿翁護種後年年花稅多豐盈他時酬神酒先貰任  
翁一醉翁無憎

貨錢

震澤鎮志蠶時貧者貸錢于富戶至蠶畢每千錢償息

百錢謂之加一錢

董蠶舟貸錢農民養蠶乏資貸于富家蠶畢貿絲以償而息其什一富家實漁利而農民亦賴以濟蠶事故以爲便焉益中餘粟食已罄笥裏寒衣典無贖買葉無錢餬

口難何人肯乞

去聲

監河潤里中豪右富熏天千鏹萬貫流

如泉鑽核障簾鄙且慳今年廣放加一錢貸錢一千息一  
百儘許阿儂徒手得傳別何須合兩書責償毋許逾三月

負歸兒女亦熙熙養蠶豈復愁無資只期今歲還宜早料

得明年借不辭子母償清絲賣矣歸來依舊囊如洗青黃

不接可奈何待喫豪家轉斗米

四五月後春收已畢秋穫未至里語謂之青黃不接

董恂貸錢

加一錢率以夏至爲期過此必另起息名曰小利

清明已過將梅夏邨

農拊擋無休暇儲無儋石懸罄如安得餘錢計桑柘趁墟  
走訪足穀翁人未登門氣先下已慣寅年用卯年何妨潤  
向監河借他日甘心重利償薪炭今時免賒貰豈料年來  
足穀翁慳貪心計尤狙詐較量加一息尙輕竟使錙銖到  
葉價先期買取奇貨居乾沒還將厚利射

糊筴

遣閒瑣記

鄉間婦女糊蠶筴

音大或借用籬字亦作筴字

率用舊書

敗卷云可辟邪字紙多遭汗損毀棄宜切戒

烏青鎮志蠶

之初生用篩置之烏滿則用蓬蓬必以紙糊其縫兩眼出雍盛之用筐或用匾器之大者可以容蠶之多也

紀官蠶紙歎文字歷災厄秦火未為深六經已殘缺復此汗穢侵吳興四月間蠶箔紙應禁嗟哉鄒魯書竟為蠶矢淋顧此心戚然習俗痛日沈何以挽斯風放筆徒長吟

董蠶舟糊蓬

貯蠶之器見于湖錄者有筐篋篩蓬皆以竹為之蓬以紙糊其孔村婦又剪紅紙為方勝黏其中且惑于二氏之說至乞其符籙貼之謂足以祛祟

曲植蓬筐必先具備豫由來是要務野人未熟攷工記善事詎知須利器傳來矩矱自先民農家者流夙所遵蘆簾織就更糊蓬買來側理銀光勻暖水手料和麥麵周圍方空黏須徧糊成倚向夕陽烘一色光明如月容更憑摻手翦方勝鏤盡一翻新喜紅紙

先貼中央後四角勝裏香匳招百福要祈園客錫休祥免向羽流乞符籙

董恂糊蓬烏兒初收門未閉蠶具安排事非細先期一一要檢點善事從來在利器已買桑籠更結蘆還教糊蓬逢晴霽兒夫昨日趁墟回買得光明紙如縑更喜聰明小女娃翦紙成花作如意調就銀漿細意糊但祝今年倍吉利去歲東鄰作道場僧家符籙多真諦阿儂幸喜收藏來廿四分收定有冀

南溇志卷三十終

南溇志卷三十一

里人周慶雲纂

農桑二

收蠶 〔縣志〕清明後穀雨前用舊絮包種六七日或以帕裹之

置熏籠一宿謂之打包天暝則置之牀上天寒則抱於胸前

宜老翁老婦任之取其溫和適中也 〔育蠶要旨〕看布種其

子變綠謂之戰色俟全綠即可收三朝後當將種鋪開在向

陽處如陰雨或在牀上或在竈上以暖處為佳待其脫殼採

花葉少許 〔俗名〕野薔薇葉 〔俗名〕做絲花 去梗刺燭燥研末其香無比用麻布

篩篩在種上 〔蠶得此則〕脚鬆易刷 候一箇時辰用食鍋抹乾 〔金漆大盤亦可用〕

將鷺毛輕輕刷攏收於鍋內更用小圓竹器鋪礬糠灰一層

雜以石上襯以紙即放蠶於器中上用切細嫩葉薄糝收下後葉

宜切細初眠後可蠶二眠後蠶即能食凡收下未曾食葉即

一二日不飼不致餓壞倘喫葉些些以後稍饑即斷絲腸矣

放在暖處謂之冷看須六七周初眠倘用火較速用火者蠶

器擱架上藏牀中火爐燒炭擊一箇俗稱炭基用灰蓋好置架下

不得過熱蠶器亦須時時移轉葉亦頻頻糝上謂之三日三

夜趕頭眠然不若冷看之妥惟遇春寒用火可免畔亦作

作際俗用薙替羅字並非蠶畏冷湧幢小品其既食也乃

熾炭于筐之下并其四周剉桑葉如縷者而謹食之又上下

抽番晝夜巡視火不可烈葉不可缺然又不可太緩緩則有

漫漶不齊之患矣編經曰蠶薦用以圍火恐其氣之散也東

稭曰葉墩用以承刀惡其聲之著也是為看火遺聞瑣記

初生之蠶俗名烏兒每重一錢十六兩可得出火一斤大眠

四斤並廿四兩秤為中平之率烏青鎮志葉稀即補之烏密處

以細竹筴撥勻

董蠶舟收蠶諺云穀雨不藏蟲收蠶以此為候焉擇吉日

中或以篩或以盆視所便又取刺梅花之葉縷切布其上

蠶得葉香蟄者盡出乃以戥子權其輕重始飼以葉目刺

梅葉為花葉者別於桑也郡人謂蠶房埽畢窗已糊吳鹽

裏去迎狸奴良辰急向厯頭檢城中前日齊攤烏炙殘桃

葉蠕蠕動毫芒細更輸鍼孔紛紜紙上密成團四寸鶯翎

慢撚攏刷下先將小榼承細敷花葉一層層蠶孃早欲知

多少敷罷還從戲上稱從此育蠶多禁忌扎闔豫防生客



至三寸紅箋淡墨書家家徧貼蠶天字

董恂收蠶下蠶最早惟我湖昨日前日齊攤烏歷頭日腳  
今又好收蠶莫把良辰孤鶯翎一雙早購置細意更有垂  
髻姑囑姑開包出布種蠕蠕戢戢生意蘇紙上拂拭置筐  
內攢如絲髮無細麤更教持戢較輕重胥言種最今年敷  
小筐紙糊潔且淨一層細葉青平鋪揮刀束砧忙復忙何  
殊慈母將嬰雛

忌蠶

育蠶要旨忌蠶之說鄉人最信往往用蘆簾圍住不使  
人出入稍有變端卽占卜禱祝或謂生客所衝或謂陰氣所  
犯雖屬附會然在旁人知其忌蠶必須謹避庶不致歸咎也  
有實係當忌者曰雨曰霧曰黃沙曰氣水葉葉久貯氣曰煙  
熱蒸溼者

氣曰油氣

熱熱油尤忌

曰酒氣曰穢濁氣

采桑

育蠶要旨桑葉稱爲鮮貨不可多采恐其乾而蠶不欲  
食則暴殄矣又不可少采或遇霧雨黃沙也有霧甚毒雨亦  
不宜黃沙必洗

倘逢大雨則繩經於檐前將桑葉挂上風乾水漬或用扇揮  
之小蠶時只采葉片出火然後開翦如蠶多則二眠卽開翦

董斯張桃源憶故人采桑一庭麥雨薔薇亞穠綠描成口

夏蠶市今番來也剛直開圍罷碧雲叢裏紅衫卸錯認

海棠花謝翦得半筐歸舍釵挂桑枝下

董熄采桑曲吳下重蠶桑采采朝復暮葦簾愛晴和溼食

忌雨霧婦姑辛勤不得眠筠籠壓背墮曼髻地狹人稠葉

垂盡騰價撐過賣葉船借得幾貫青銅錢購置飼養俱蜿

南澤志 卷三十一  
三  
蜒上山作繭厚復圓纜車伊軋火晝然翳布不用一縑被  
一月樓羅半顛頓絲多價賤何處賣催租人去債主至  
董正采桑行朝采桑采柔枝暮采桑采枯枝朝采暮采不  
自飽廢置櫛盪愁蠶饑辛勤圖上簇絡繹看纜絲去年東  
郡蟲食稻流民牽帥逃鞭笞村村乞食餓且死桑籠雖在  
誰提攜今年西村苦冰雹隴麥顛倒桑離披幸茲獲生聚  
比戶天所私微陰障晴日小雨溼茅茨葦簾土銼牛涼燠  
敢憚操作謀荒嬉但願繭雪白絲價良不訾上輸賦稅下  
艱食荷鉏共事東臬菑

董蠶舟采桑一片碧雲籠四野戴鴛聲中見桑者儂家有  
地十畝寬半在陌頭半牆下郎憐儂是新嫁孀嬌羞尙怯  
遵微行顧語小姑汝予助同向南塍采葉去宿葉未盡蠶  
未饑偷閒偶啟白板扉家家閉戶寂如水拾葑畦邊譁稚  
子綠陰陰地聞翦聲林中找到處桑梯倚須臾夫壻負筓歸  
堆來滿地青玉肥只願吾蠶食葉速速采不辭勞僕僕默  
思地窄葉無多飼到上山恐不足保得安全過大眠典卻  
金釵開葉船

董恂采桑種桑須種儂屋邊儂行采桑近更便提籠朝朝  
又暮暮不須南陌還東阡日間飼蠶采猶易夜行畏露零  
涓涓良人爲我購竹筓薄暮挑取盈窗前何待更深復外  
出愛儂情重儂亦憐所愁蠶多葉復少不堪無葉偏無錢  
卻喜今朝蠶不食滿筐滿箔齊三眠拔釵付郎去稍葉天

明餉食難稽延

張樹培采桑曲房頭防夜有狸奴眠對燈檠照影孤忽被  
 子規驚夢醒起看稀處葉重鋪 桑陰如幄柳垂街匝月  
 辛勤繫妾懷侵早最愁春草滑倩郎先買小蒲鞵 斜風  
 細雨最魂銷陌上歸來路尙遙幾樹低枝儂盡折待郎來  
 取最高條

稍葉 育蠶要旨如桑地少必須買葉大眠後開葉船買葉當  
 用十擔先買五擔恐蠶或不佳不至餘葉且恐價有低昂也  
 如太昂則屑米粉糝葉以飼之道光二十二年又停葉之法  
 亦稱住葉葉來之時先向陰地上鋪蘆蓆或竹簾葉放其上  
 不可鬆亦不可過緊須將每帖豎起整齊平直清水灑之謂

之封好一周宜灑三四次可停二日或兩日臨飼蠶時將葉放鬆涼

透停處必熱否則有氣水葉蠶食即壞 胡承謀府志稍葉湧幢小品

作其預立約以定價而俟蠶畢買絲以償者曰賒稍有先時

予直俟葉大而採之或臨期以有易無胥謂之現稍 遺聞

瑣記蠶時往烏鎮做葉是南潯一做俗名爲貿易實同賭博

究之得利者少失利者多有葉賤而虧本者有刻意居奇以

致過時不及售者有受市儈之欺并本錢無從追問者後人

曾不知鑒爲之不已蓋市易叢集之地便于遊蕩故樂之而

不悔也

董蠶舟稍葉 桑爲湖屬恆產直名曰葉以人人所知也而

葉莫多於石門桐鄉其牙儈則集于烏鎮三眠後買葉者以舟往謂之開葉船買賣皆曰稍吾鎮之饒裕者亦稍以

射利謂之作葉又曰頓葉凡葉百斤為一擔郡中則以二十斤為一箇家家門外桑陰繞不

患葉稀患地少及時惟恐值尤昂苦語勸郎稍欲早我家

稍時在冬月一擔不過錢五百迨至新年數已懸蠶月頓

增至一千未到三眠忽復變一錢一斤價驟賤夫婿聞之

咎阿儂而今欲悔已無從儂笑謂郎莫爾爾吾家所失殊

無幾不見街頭作子賀切葉人折閱已過大半矣此曹平日

子母權計利析到秋毫顛居來奇貨不肯鬻黃金不飽貪

夫腹去有腰纏返垂橐烏戍歸來唯一哭

董恂秒葉樹桑牆下地不多蠶食不足如葉何鄰翁明日

向烏戍顧語夫婿無蹉跎葉行早晚價不一秒遲秒早宜

猜摩清明插柳妾曾卜今年平穩靡有他但願初貴後時

賤彼做業者空婆娑當其貴時儂有葉牆陰屋角枝猗儺

待至蠶長葉已賤葉船兩兩門前過百斤亦祇值錢百翦

刀聲裏多歡歌

〔金鍾秀蠶家新樂府〕做桑葉昂然高坐踞牙儂賣買人多

闖戶外忽贏忽絀權獨操伎倆畸衰此其最買者未必皆

養蠶販夫漁利殊眈眈可憐窮氓日勞苦蠶多葉貴情何

堪吁嗟乎局外閒觀徒扼腕惡習何時除壟斷

飼蠶 青蠶要旨 大約每蠶一斤廿四兩秤自收下至上山喫葉一

百八十斤十五兩三錢秤此上上蠶也稍平者不到此數小蠶時只

采葉片出火然後開翦

溫曰鑑飼蠶行桑扈初鳴麥花落家家閉戶事蠶箔鄉村

四月斷往還陌上綠雲亞髻鬢日斜不見青絲控紫萋綠  
枝醉禽弄蠶饑葉貴空執筐呼婦須鬻嫁時璫

董蠶舟飼蠶束枯為墩日葉墩又曰草墩用以承刀剉葉如絲以飼之二眠後與完葉三眠則連枝與

之日夜謹飼不令稍饑饑則有斷絲腸之患出火前忌溼葉大眠餉後又惡太燥以潔水灑葉而飼若傷于寒則僵死鬱於熱則破囊俗所謂爛肚也風終朝斫斫費摒擋藁

砧束作明月樣絲絲青葉如牛毛細意聶切何辭勞浹辰  
之間眠過二眠起便將完葉飼盼到幾時纔出火連枝喂

食無不可只愁霧雨氣鬱蒸檐前風戾懸長繩小蠶惡溼  
大宜潤手瀚寒泉細噴喫調饑未怨朝食遲生怕蠶饑甯

我饑蠶饑便恐絲腸斷未敢片時少稽緩一宵四起黎明  
興阿母年邁猶能勝回眸一笑呼小妹鋪筐未了垂頭睡

董恂飼蠶蠶饑蠶飽不可過早起飼蠶何敢惰只愁饑後  
斷絲腸那顧女嗁與兒餓辛勤更是小時難葉溼宜揩大

宜剉盼到今朝捉大眠帶葉連枝滿筐簸所恨連朝風霧  
深照料稍疏又囊破竟晝絲宵那得閒幸是兒夫肯儂佐

葉乾葉溼要關心與少與多莫相左夜間飼罷且偷閒和  
衣暫向牀頭臥

金鍾秀蠶家新樂府關蠶門吳鹽聘取狸奴歸家家紅帖  
糊柴扉此時最忌是生客悻悻村落行人稀行人稀無剝

啄門內蠶孃忙碌碌朝朝暮暮不出門容易縑車動茅屋  
噫嘻吁新絲做得百兩無又聽打門追宿逋

頭眠 育蠶要旨 蛻殼時不食不動名曰眠初眠雖係學眠究

欲其齊朝見眠頭而夕定藜夕見眠頭而朝定藜其蠶必佳

眠頭欲眠者數十箇也定藜無不眠也雖屬好蠶終不免有青條俗謂頭眠頭頂沙頭戴蠶沙矢

二眠蠶挖蠶然猶不足憑唯看其蠶色放白蠶身長大旺葉

以後漸漸色黃收身褪葉嘴尖有黑二殼此將眠之候也葉

不可多采每眠並同不眠者謂之青條定藜後用礬糠灰糝於面

上再用葉片剪開貼在藜上其青自來謂之引青捉之自盡

不可過遲遲則有起孃二眠出火多不齊矣又將蠶藜細細拆開再用散石灰同

礬糠灰拌勻糝於面上或日光中或火爐上稍稍溫暖令蠶

綈乾燥眠亦易起否則起孃食葉不齊也胡府志蠶將眠

不勤食曰紅孃思吳興蠶書結嘴停食曰眠蛻膚向食曰

起時寒則遲時溫則早此天為之也冷看則遲熱看則早此

人為之也烏青鎮志初眠仍以竹筴細細分開去其殘葉

不致傷于溼熱

出董蠶舟捉眠蠶食三四日而眠眠一二日而起是為初眠

日出火出火後再眠曰大眠將眠則食不勤曰紅攬絲又

有青攬絲言吐絲也亦作孃思言孃而思眠也他眠而此

猶食曰食孃亦稱青條眠起曰孃思欲眠猶未眠青紅攬

起孃眠則擿置他器曰捉眠頭出絲纏絲貯餘筐簾勤拂拭一一移置當窗前或食或眠

難畫一先後相差無半日擿此未徧彼已眠兩手持据不

遑息傾耳沙沙聲漸小知是筐中食孃少眠頭欲盡又怯

寒捉罷更將帷帟繞深夜捉眠多苦辛妾容無復桃李春

三眠四眠蠶易老鏡裏紅顏豈常好

董恂捉眠二眠四眠種各異欲眠不眠攬絲未小姑纔向

筐箔看道是今番不須飼紛紛多見紅嬾思只在黃昏眼  
可遲縱有食孃也不多緣枝求葉無三四囑姑慎勿貪戲  
頑晚餐端整炊蔬食大家飽飯腹不饑捉眠好盡今宵事  
已眠未眠一分曲植籩筐忙位置手中碌碌猶不閒早  
見朝曦小窗至

餉食 百蠶要旨 初眠以後約一周或半周 量天時之寒熱 看繅上有

白絲如絲謂之楊花繅然後可以餉食或看其嘴上始白漸  
黃終至稍黑亦可餉食總以眠頭盡起為度恐其早晚不齊  
也 遭閒瑣記 凡眠起餉食如起孃不甚齊不妨稍遲以俟  
其齊俗謂之熬 按餉式亮切俗誤讀餉如向乃以餉食為送食非也 廣蠶桑說 眠一  
次則嘴闊一次衣寬一次布葉太早恐嘴已闊而衣未盡脫

者亦食之則腹大而未脫之衣脫不下矣

董蠶舟餉蠶 眠起始食曰餉食倍于前衡之重亦逾倍者

過因語息 眠頭捉罷夜未央遽遽一覺投匡牀筐中枕畔  
兩同夢良人呼起將三商飛蓬雙鬢久罷櫛今朝偶到妝  
其臺傍梳頭未半娣姒喚可是筐中有起孃女兒女兒新睡  
起雪色肌膚倍肥美此時飼之勿太亟少緩須臾乃餉食  
俄頃葉過惟留莖到耳一片風雨聲蠶身日長 上聲 蓬日分  
昔時一斤今五斤

董恂餉蠶 吾鄉育蠶以斤攆不以城中筐數論一斤出火  
至大眠稱得五斤已無恨今歲儂家喜氣多卻於此數更  
有進蠶眠已過一晝夜餉食須教者時趁大婦提筐采葉

歸小姑提甕汲水潤密堆層疊筐籩中一色綠雲最嬌嫩到耳欣聞切切聲纔得須臾食已罄傾籃倒籠從頭添敢令遲延致饑困

二眠 宵蠶要旨看眠頭如頭眠法惟餉食不比頭眠及出火不可過熬大眠餉食稍嫩亦不妨大凡天氣寒暖調勻收蠶至上山一月為期初眠七周二眠四周出火四周大眠四周上山七周

其中有餉食數周故時候如此但隨天時為轉移當七周五周亦可當四周三周亦可過月者無是蠶也外三眠子無出火只有大眠其時較速更有頭二蠶雖是四眠比尋常四眠稍早其子即可育二蠶杭州山中并有三蠶四蠶五蠶然不似吾湖育蠶沿門闔境也西吳蠶略二眠退皮長二分許黑色退而漸白食葉聲亦稍大

出火

宵蠶要旨看眠頭如上法見眠半周後必即用葉片引

青倘天熱尤不可遲恐其有起孃也初二眠折蕪即當燥蕪出火則

眠齊後徑將眠頭捉出其蕪棄之乃用秤權之近時廿四兩秤其捉

若干將籩用礬糠灰鋪底置蠶于中每籩或三斤四斤皆可

上用散石灰稍稍糝之鄉人謂之供俟有起孃即用蕪子預

先曬乾拆開放在面上起孃不至沸騰如天陰用稻柴剪斷

亦可起齊後方可餉食如蠶少買出火須擇其絲緒纏縣者

為上 西吳蠶略長約三分映光照之頭作碧色乃出火之

候起齊後方可布葉聲如小雨 烏青鎮志出火後不事竹

筴用手一一取下秤定分攤筐中又有復生小蠶者為長上聲

孃 遺閒瑣記舊法小蠶用火至三眠去之故名出火近多



不用火而出火之名仍相沿不改蠶多則論斤鬻之少則買之俗曰撥出火蠶出火後始有長孃至上山時亦隨母作小繭 虞兆澹天香樓偶得俗以第三眠為出火不列諸眠之中因以末眠并頭二眠為三眠三起實則四眠四起也

〔金鍾秀蠶事新樂府賣出火〕一眠再眠蠶漸粗十株五株葉漸疎時當出火葉已盡眼看蠶饑心不忍買葉既無錢蠶死尤可憐賣蠶一半來街前以之買葉蠶兩全嗚呼養得蠶多收豈寡君不見今年芒神圖上三姑把

大眠 育蠶要旨蠶至大眠好歹已定一半好者眠中齊集稍有青條蠶身均勻並無大小其色青白若一周外尚不眠青條無數布漆甚多其面必當棄之凡出火一斤得大眠四斤

為四斤捉得五斤則為五斤捉看眠頭如前法惟餉食時候比出火可早食葉可灑水氣水葉終不可喫 〔遺閒瑣記〕末眠為大

眠即大起也此時尤須勤執 〔廣蠶桑說〕大眠起後食葉愈速能一晝夜食葉十餘次則五晝夜即老矣能多食數次更好蓋此時多食一口葉則上山多吐一口絲故唯恐其食之少

執括 育蠶要旨蠶性喜溫而又惡溼熱故必執括執括必剝去底下一層不使溼熱薰蒸括則取其面上一層而執中猶有蠶在內必當搜剔淨盡倘有疆爛白肚空頭等蠶棄之無遺故無論寒暖每日

宜執括一回而出火及大眠時為尤要更有救逆之法如爛肚傷熱吐水白肚二種氣空頭小蠶時失布漆身有黑斑點

必須勤練方不傳染如殭蠶傷冷癘孃不上葉生種可噴燒

酒或甘草水又法以馬毛鋪在蠶器內可免諸病倘大眠後

放地蠶不必練括湧幢小品大起則殭殭則分箔殭早則

足傷而絲不光瑩殭遲則氣蒸而蠶多溼疾

董蠶舟出殭葉過後枝莖雜蠶矢充積筐中蠶棲其上久

於葉上乃舉網而出之移置他器曰出殭筐中之枝莖

及蠶矢謂之殭子俗呼蠶沙垃圾以壅地則桑倍肥大

起已後食倍加須臾止賸枝槎枒枝間遺矢更狼藉積來

箔底何紛拏滓穢叢殘待捐棄始可再將新葉飼更欲移

蠶置別筐一一摺拾談何易惟將罍筐上張網中層疊

敷柔桑蠶從網下來就食一網舉之誠善策枯莖殭出芻

狗陳明日晨炊可代薪豈徒爨下供所乏更得草人土化

法亭亭如蓋桑陰遮得氣全賴壅蠶沙

董恂出殭葉裁如縷蠶猶小葉細無餘殭亦少自從出火

過三眠大葉粗枝似芻藁須臾葉過只留枝倘教檢取亦

難了卻將絲網置筐中一網出之計誠好枝空留作爨材

供細沙肥沃宜桑稻鄉人勤苦棄物無能供所需便堪寶

最憐渴蹶一月餘徒說山頭如雪皎待到絲成繇白時唯

此區區可相保

鋪地育蠶要旨大眠餉食一周可放地蠶但著地必鋪石灰

及草柴柴不方免寒濕及蛇蟲胡府志藉蘆蔴而散蠶其

上吳興蠶書遇天時潮悶宜取乾茅草切細勻撒蠶面上

飼以葉可以隔其熏蒸也

董蠶舟鋪地

有蠶多而盛蠶器具少者大眠後鋪蘆葎於地置蠶其上謂之下地蠶郡中及他方盡然

吾鄉則十家中無二三也

唯濱太湖諸村與郡中同出火五日大眠過吾家蠶具備

未多區區筐曲盛不足籌量無計將如何打頭賴有三間

屋几榻不妨盡度閣埽地平將蘆葎鋪暫借坤靈作蠶簇

僅餘臥室在東箱上羅箱篋下支牀此際已難居八口來

歲小兒又娶婦只願蠶花收倍豐不愁明年無處容別築

新居高百堵華堂卽是鋪蠶所

董恂鋪地今年大眠十倍捉蠶具翻嫌置未足具少蠶多

可奈何幸得儂家富於屋房軒用當箔與筐埽除苦乏僮

和僕深賴青紅兒女多一握稻柴如帚縛各自東西灑埽

忙蘆葎平鋪卽蠶箔只教有地可著蠶邊計此身偏跼促

況是蠶多食亦多堆葉還須讓屋角臥牀亦撒挂梁間倘

要安眠待蠶熟

搭山棚

育蠶要旨空屋一間要乾燥通風離地約四尺高中

用數根木橫住上鋪蘆簾簾上有帚頭立起蠶安其上卽爲

上山 遣閒瑣記山棚宜寬蠶多棚小則同功繭必多 吳

興蠶書又宜暗老蠶見亮光輒遊走無定不卽裹身蠶上齊

後所有窗戶悉宜遮掩蠶之成繭不能無所依傍故棚上須

立草帚

董蠶舟搭山棚

室中架竹木高五六尺布蘆簾圍草薦列草帚於簾上置火其下有力之家度室之

廣狹削木如其長廣一尺餘厚五之一四足如杌子狀謂

之山棚免用省架木之勞府志云去蘆簾尺許以細竹結

爲方孔用以架草謂之眠餉食蠶多老料理山棚須及早

盡將家具度梁間慚愧儂家屋較小架木倚竹結構牢去地未及一仞高布以蘆簾平似砥草薦三面圍周遭上轟帚頭下擦火棚底痴僕往來可何須更列花格竹不致欹傾亦已足經營拚費一宵功切誠兒曹毋欲速鄰家家富貪安閒新製雙凳厚且堅因斯結縛遂草草棚倒覆火蠶被難我家力不能辦此無恃乃得常無患平山棚歲歲安如山

董怕搭山棚蠶老須置山上頭搭山縛棚屋四周中央巨竹橫又縱上鋪蘆席如平疇高低結束事麤了忽聽笑語談湖州不知花格竹何取工夫破費真無謀豈如儂家最省便一般作繭無他愁上安蠶帚下灼火也如戶牖同綯

繆只憐屋低立難直終朝棚底行偃僕但願今番得大熟明年起屋高於樓

架草 育蠶要旨 帚頭之形與筦帚倒轉相似要灑得開立得穩不至眠山 湧幢小品 作繭用柴帚以禾草為之長尺有咫大可一握散布登蠶其上有至二三重者

董蠶舟架草 截禾稈長二尺許大可一握散其兩頭剉切平之繩束其中列置山棚上使蠶憑以作繭名曰帚頭冬春間東作未興或風雨長夜預取秸藁縛束剉斫謂之斫蠶忙柴有惰者至以高價購諸鄰人云禾稈一握二尺高縛作帚狀繩束腰兩頭剉切平若砥矗立豈復愁傾搖架構山棚已就緒左右前後排以序斜斜整密於林犬牙出入相撐拄去歲豐收饒稻藍結來草堵如高崖冬春白米已上囤乘閒先斫蠶忙柴不憚勞勞到

南漳志 卷三十一 農桑二 三十一 農桑二 三十一 農桑二

深夜閒時肯忙忙得暇今朝用去尙有餘賣向鄰村博高價

董恂架草去年田熟多收稻清白枝枝不枯槁先留今歲蠶忙柴幸是藏多不嫌少須教平截一樣齊二尺許長乃正好每草一握中束之散其兩頭計亦巧不疏不密置山頭不高不低互相繞簾上先教次第排那容欹側愁傾倒日來寢食竟無閒架草搭棚事難了聞說鄰家繭已成來歲收蠶也宜早

上山

青蠶要旨將上山則有考孃

考或作巧

色黃收身不欲食葉

與欲眠同而沸騰不已周身通明與欲眠異

倘通明而無絲腸又是空頭由

於小蠶時餓也小蠶不可失葉直至上山始見悔之已晚或云蠶沙入水浮亦欲上山也

上號好蠶上山後即做半周即如白雪謂之裹身一周有聲兩周無聲在內細作人不可動四周做好方可採取如上山不做繭必是爛死疆蠶及白肚見有兩周後尙不做者即當輕輕拾去不可使其壞在帚上有礙好繭也湧幢小品大起六七日爲熟巧爲登簇巧以葉蓋日貼巧驗其猶食者也簇以藁覆曰冒山濟其不及者也

董蠶舟上山

蠶將熟脰節瑩徹吐絲繚繞謂之繚孃於是撒置山棚上曰上山一二日間皆作繭矣郡

中上山後往往有白蠶之災所見之地蠶繚孃不眠亦不繭一空故擊鈺鼓以驅之吾鄉則無是也

食脰節通明無葉色撒向帚頭俾作繭早晚不過一二日盤盂一一各分盛盡喚家人來并力儼似迴風舞六花飛空齊向山頭擲日未過晡事已竣久勞得逸翻欠伸棚邊

席地聊假寐曹騰睡思濃於雲何事鄰人競奔走伐鼓攃  
金疑逐寇婦女駭詫兒童藏共說弁山來白蠶聞言瞿然  
遽驚起浸階明月涼如水夢想顛倒乃若是一笑吾鄉本  
無此

董恂上山縛棚初就蠶都熟已見繚孃滿蠶箔合家飽食  
趁朝閒摒擋今朝蠶上簇小兒捉蠶盛向盤大兒上蠶據  
山角取蠶散布蠶草間疏密密山頭轟今年蠶好勝往  
年卻苦山棚限于屋上山已罷暫休息棚底相借坐瑟縮  
小姑作勞倦不支看山卽向山旁宿關心忽憶嫁衣裳軋  
軋聲驚眠不足

金鍾秀蠶事新樂府望山頭手攜一榼來殷勤小姑大婦  
歡迎門牽衣共至簇山下大家吉語相溫存爲言瓦卦今  
年卜廿四分收意良足明朝當賽馬頭神款留一醉老瓦  
盆

擦火 育蠶要旨山下著火一周用炭火甚旺 遺閒瑣記南  
潯去城七十里耳城中曰養蠶南潯曰看蠶其名已異又城  
中蠶以筐計葉以箇計南潯則並以斤計而育蠶風氣不同  
之處甚多卽如山頭草帚城中以稻草屈而扭之兩頭向下  
其形下大上小南潯稻草不屈束腰偏下其形上大下小又  
棚下擦火城中必蓋以灰不欲其過熱南潯則必吹使極熾  
蓋城中作肥絲南潯作細絲各有所宜也又有冷種不必用  
火 湧幢小品湖郡每蠶忙時必有小鳥連叫曰灼山看火

其聲清澈可聽蠶畢則止蠶室暖育者倦極常有火患 寫

青鎮志 蕪炭山棚下曰擦火 廣韻擦桑割七曷二切 使熱上升則乘此

縈絲作繭不停口而盡出腹中所有矣

董蠶舟擦火 上山後遇輕陰薄寒即蕪炭於山棚下蠶喜溫和故也縣志謂之炙山吾鄉謂之擦火亦

日灼山府志云先是有鳥鳴如日葉貴了至是又鳴日灼山看火意似相警者吾鄉亦有之 棚底輝輝

燭火爛老瓦盆中熾薪炭更番守視不遑安自明至昏又

達旦性愛溫和怯寒洵要得微陽相嫗煦煥氣掀騰舉體

熱乙乙抽毫絲不絕靜中似聽唧唧聲山頭作繭半已成

去歲連旬不開霽市中炭值頓翔貴今年天氣猶暄和差

喜所用猶無多祇恐周防稍怠慢祝融回祿能為患東家

峩峩好堂宇可憐一炬成焦土樹杪禽言如警我請君灼

山須看火

董恂擦火 山前山後聞鳥聲灼山看火作意鳴蠶性愛暖

要火力紛紛薪炭盆中盛山頭繭密白似雪山下火烈同

光明繭聲唧唧響不絕祇覺暖氣周掀騰全家聚坐共閒

話門外忽爾喧囂生東家擦火失防檢不幸飛燄延柴荆

四鄰奔救咸歎息可憐一炬無餘贏歸來舉室共相戒慎

勿貪睡當兢兢

回山 育蠶要旨 如用火三周回山不用火四周回山 不動不

如少人做絲可 每出火一斤收繭五斤為五分十斤為十分

遲一周回也 稱繭 廿四兩秤 或八斤或七斤為一弔 不可再少恐做絲 兩弔可

做絲一車必須安放簾內令其涼爽毛繭易蒸恐其出蛾也

吳興蠶書嘗取四眠蠶之眠頭與繭細較之出火蠶一兩約計二百五十六七箇大眠蠶一兩約計六十三四箇是出火長至大眠實增四之三好蠶每兩計二十二三箇次者計二十六七箇是一兩大眠箇箇成蠶好者應得三兩次者應得二兩六七錢俗以蠶一斤得繭二斤為對花猶屬八折算也採齊稗準庶知一歲蠶事之豐歉 湧幢小品三日而關戶日亮山五日而去藉日除托七日而採繭為落山 為青鎮志過三日撤火開戶去蔽令風燥透繭易于線絲否則類多難練而虧折寡斤兩矣

董蠶舟回山

上山七日後采繭曰回山縣志云大起時稱得六斤為一筐每筐收繭一斤為一分以十二分為中平過則得利不及則失利吾里則以出火一斤得繭一斤為一分遞增至六七分為中平十二分為上上

矣諺云蠶花廿四分乃頌禱之夸詞也西鄰傷冷蠶則疆東鄰過熱蠶破囊

功敗垂成自古有奇變難防上山後山前百徧行徘徊七宵魂夢常驚猜凌晨一眺喜過望滿山雪壓光皚皚踢壁大聲呼起起吾家今日回山矣繭多還恐器難盛檢點瓶罍及筐篚勻圓萬顆明珠垂間以黃碧光陸離堆來高與山棚齊不須如瓊誇神奇持衡細把分數計何敢癡心望廿四卻嗤老媪太貪愚還祝明年勝今歲

董恂回山屈指上山已七日山頭璀璨堆如雪層層密壓滿四圍蠶簇不分只一白明珠纍纍相貫聯不須如瓊誇園客今朝已屆回山期相呼并力全家集男兒取高還取低婦女采疏復采密只愁繭多無處盛草節桑籃盡堆積



去年記得十分收何幸今年口倍得爭把權衡度重輕婦  
姑兒女齊歡悅

董正採繭圓勻白雪播山巔采采如雲滿眼前匝一月中  
眠食廢鳩鳴又是鴟鳴天

選繭 育蠶要旨 剝去繭衣擇其圓白者其中有同功繭一繭兩蠶

黃繭綠松繭棱角繭限於地而不能舒展故不圓尿暈繭為他蠶所汗爛死繭

作繭後即死薄繭力不足香眼繭大眠後為麻蒼蠅所蔽作繭後其

必須常拂點當一一選出然後其絲光而且白鄉人往往貪

重選之不淨以至其絲黑色其實多而不精無益也況所選

出各繭亦非無用同功繭上者可做絲次可剝絲黃繭綠松

繭可做經絲亦可做緯絲黃絲染紅棱角繭亦可剝絲尿暈

繭可做粗絲爛死繭薄繭可做澁花香眼繭亦只可剝絲外

此者做絲所剩滯頭及繭衣此二者當煮熟河中敲軟可打

絲綫沙藕可作壅蛹可燭食亦可作壅蓋蠶之一身無一物

無用也

董蠶舟擇繭按府志繭之類不一有被汗而緒衰者曰推

者曰絲繭兩蠶共成一繭而緒亂者曰同功又有黃繭碧

繭黃者緒粗碧者質厚此類皆別擇之以不中繅也繭外

散緒曰繭衣俗謂之繭黃助擇者呼兒堂前撤山棚命匠

剝剔去之即為所得以代雇值云新造絲車成速招鄰媪助擇繭選來晾趁天晴明絲繭黃

繭區以別良苦醅疵細抉擇今年差幸少烏頭不乏同功

與推出此類惟供煮作絲其餘一色光瑩然繭衣蒙戎搓

作團持贈鄰媪為傭錢留取幾枚白勝雪去蛹藏儂鍼綫

帖他時攜往阿母家倩人翦作鞦韆頭花

婦女翦繭作花置鞦韆頭上繡以綵絨

曰鞦韆頭花里俗所尚

董恂選繭烏頭推出繭不一更有同功縑不得儂家幸是好蠶花潔淨光明同一色東鄰西鄰繭更多碧繭黃繭不勝擇倩儂相助遴選之卻緣晾繭無暇日偶遣嬌女暫分忙可笑童心猶似昔翻將白繭幾許藏道是明朝逢午節鏤出新花待繡鞦韆成飛鶴堪簪髻排車作竈事紛紜坐向深閨不肯出

縑絲

育蠶要旨絲欲其細而白欲白必多換湯水欲細不可

惜工夫又絲竈必須用煙囪使煙直透絲上無煤氣燒柴亦須揀擇最好是栗柴桑柴次之雜柴又次之切不可燒香樟

其氣能使絲紅色絲必欲其好做好做則蠶蛹身上無衣絲多而工夫不費若好做而繭選得白是為上號倘繭白不好做終是次號因繭在湯中多滾去其顏光矣其故由於上山時潮溼悶熱則絲必不好做上山之不可不講究如此 冥興蠶書絲之高下出於人手之優劣同此繭同此斤兩一入良工之手增多絲至數兩而勻細光潔價高而售速故不可不慎擇其人也 志彙近時多有往嘉興一帶買繭歸縑絲售之者亦有載繭來鬻者縑時熾炭於絲輪之下則絲速乾而有光謂之擦車頭火

徐有珂縑車圖說縑車之制其牀方有四柱下近足處四面皆有橫檔上則兩旁及後有之而虛其前前兩柱名鉗

南齊志

卷三十一

九

百集志

卷三十一

九

農桑一

農桑二

農桑三

農桑四

農桑五

口腳鉗其首以受軸軸轄四出其—可脫以軫抵之則牢  
軸左端架於鉗口右長出鉗口外有頸其端有鶴嘴一縱  
一橫嘴卽搖手搖手之轉腳踏以連之也腳踏板之根釘  
於地耳上出貫腳板板形似鞵底上植一柱如股又作活  
腕筍而出一臂磬折而前鑿其端以納搖手故腳踏其板  
則臂一前一卻軸向前自下而轉矣車之後二柱左爲太  
平腳右有仙人椿上穿母樣橈如磨耳上出又旁上出搖  
釘頭帶一橫挑其末虛穿左柱之首故左柱之首或夾兩  
釘或有三稜穿焉橫挑上列送絲鈎三俯其鈎以鈎絲緒  
母樣橈細腰帶長繩套於軸頸軸直轉而母樣橈平轉  
則橫挑東西往來而絲之上軸也其緒不直矣後柱左右

橫檔穿入出柱之外謂之龍頭安車時常出鑊上端立牌  
樓牌樓如匚形虛其右上三垂以竹篠橫貫竹牽子三下  
傍橫挑釘絲眼三皆前出縲絲者從沸湯中以竹篴揚緒  
去其緒端而以鍼綫納緒於眼自內上纏牽子下出而遙  
縮於送絲鈎以拋於軸軸圍以布謂之車衣布緒纏於布  
軸動於踏則軋軋而抽矣 牀廣一尺八寸有半縱贏四  
寸有半鉗口腳長二尺五寸五分濶五寸厚二寸太平腳  
長厚亦如之濶四寸六分其有三稜穿者長不在此數仙  
人椿高一寸八分圍徑一寸二分母樣橈身徑三寸八分  
腰徑三寸耳高一寸搖釘頭長四寸送絲挑長二尺龍頭  
長三尺軸梗長三尺左頭徑二寸六分中徑三寸右頭徑

二寸八分鶴嘴長一尺搖手長六寸受活脫轄之眼面濶五寸底濶四寸軫長六寸長轄長二尺一寸呆短轄半之蒲柱長一尺七寸二分厚一寸八分濶二寸八分腳踏板股長二尺四寸臂亦如之牌樓內腔高一尺六寸廣二尺五分凡安絲車必嚮內而背明纜絲者倚湯鑊設春櫬時坐時立一足踏板一足着地立以送緒也龍頭出鑊上故牌樓亦出鑊上竈門煙囪必在左燒火者常向右煙囪下以土擊近一丈則以竹筒接出屋上近有用洋鐵者凡安絲車必後高而前低後足墊以石四足絆以繩置盤石於中以鎮之恐其走也軸前設火盆熾火以烘絲使出湯而卽乾也否則併其緒而不可分

董蠶舟纜絲曝繭於烈日日涼繭陰雨則火烘之使燥不合成一緒者細至七八枚則粗又有三眼兩眼之別其輕重以車計每十兩爲一車宋雷西吳里語云細而白者曰合羅稍粗者曰串五又粗者曰肥光吾鎮唯有細絲肥絲肥絲多同功繭之不亂者所繅俚語謂之唐公絲聲之譌也諺曰小滿動三車舍南舍北綠樹濃軋軋聲徹村西東竈燎薪蒸傍熾炭轂回軸轉如旋風蠹眼已過湯正沸赤手招來緒無旣如衣挈領網在綱眾縷皆從一頭曳一蠶爲忽十忽絲繭數由來多寡異三眼兩眼復不同纜成以此分粗細手牽足踏珠汗淋阿姑憫儂勞不任令儂少息起相代追涼閒步來深林林邊偶值鄰村媪爲語今年絲好作去聲立談半晌急趨還如雪刺梅滿歸路入門相視一笑譁滿頭插徧纜絲花

董恂纒絲絲車有三眼兩眼之別三眼為細兩眼為粗細計或十兩為一車或十餘兩或二十餘兩絲成論車以兩至不等也鄉人故有大車頭小車頭之名

計兩眼三眼別粗細手撩足踏爾許忙熟炭焚薪水百沸鄰家老翁身手好一樣作絲更光膩他家蠶早絲已成聞說歇車已無繼當時儂早下聘錢一車兩車肯儂替阿姑助理不勝勞換水添薪最留意白繭通教纒合羅其餘只好肥光曳更抽黃繭作絲團奉與阿姑姑所烹

董正纒絲嘈嘈風雨小車聲白雪紛綸耀日明東市賣絲春稅足茅檐猶幸責逋輕

剝蛹 胡承謀府志纒絲未盡之繭曰軟繭剝以作絲繭之下者繭中蛹俗謂之蠶女

董蠶舟剝繭繭質過厚且粗纒時浮沈水面不得盡其緒曰爛串五合羅纒罷早蠶事今年已粗了農家那得常優遊薄筐滌淨俱藏收煮餘軟繭猶堆積緒亂質粗纒不得少遲便恐蛹蒸腐棄置未免同雞肋綻衣縱未純繅如撻絰作綫原無殊剝來蠶女煎作鮓堆盤還足充庖廚投筋令予三歎息藉爾謀生翻爾食漠然未是負心人世上紛紛怨報德

董恂剝蛹纒絲煮繭事已竣良人戽水忙插田呼兒洗刷潔蠶具阿儂今日多空閒鍋中贍繭軟且薄絲頭已斷難相聯其中蠶女猶待剝莫教臭腐徒棄捐趁此長日一事無相偕去蛹臨窗前沸湯浮沈煮已熟薄者澣絮厚者絲

地藏王誕日已近燒香茹素年復年他時抱向街頭賣施  
與和尚為香錢

作絲 育蠶要旨剝絲有環絲手絲之分手絲剝在手上環絲  
則有竹環

董蠶舟作絲 絲有頭蠶二蠶之別以頭蠶為善絲亦如之  
蠶口又次之烏頭軟繭為下繭已出蛾者為絲曰蛾口繭  
軟繭為絲曰軟繭絲用織絲綱其餘概曰絲而已作絲須  
晴日陰雨則絲不速乾而清風冷然日卓午煮繭香中聞  
縷脆俗謂作絲曰剝絲兜 輾釜老晴難遇熟梅天妯娌相將同剝絲蛾口居後同功  
先竹架彎彎白月圓土鏗烈烈朱火然瓦缶漬以泉涓涓  
水中擘出架上懸當風高挂蓬門前潔如素紙薄且堅笑  
謂小姑速相助先著袴襦奉翁嫗仲冬二七是良期雙星

已近銀河渡好染新紅裝嫁衣與姑將向郎家去

董恂作絲同功推出不中繅用以作絲白且嬌更有蛾口  
好種繭汲水同向鍋中燒陰雨怕近入梅候朝來喜見晴  
光搖相偕妯娌趁早起劬勤那惜身手勞瓦盆漬水潔且  
淨輕剖重掣十指操疊成一絲繭八九竹竿挂向風中飄  
卻憐盡供償通用溫暖只讓財奴驕何曾作絮身上著嚴  
冬不免寒仍號

澣絮 遣閒瑣記水絮一曰繭黃一曰澣花一曰滯頭並須煮  
熟水中澣之又有絲捻頭不必煮澣皆以撚絲綫但視純絲  
為費功耳其中以繭黃為上

董蠶舟澣絮 軟繭之厚者以作絲其次則煮之承以新絲  
蓬浮水而漂擊數過即成絮名曰澣花

賣出償加一新絲準折還租畢僅餘軟繭是粗材區區猶  
是儂家物春花豆麥方登場夏至已過齊插秧阿儂此際  
獨無事剝煮功多趁日長煮成要借清流激小竿持至溪  
頭擊揀取一方涼最多柳陰濃處來淋漉晚來邂逅東家  
妹爲言夫婿耽擗蒲漂成攜向博場去不足供渠一夕輸  
董恂漉絮擇繭縑絲事已畢軟繭剝絲薄難疊亂頭墜緒  
更紛紛倘放棄置寧無惜幸喜今朝事不忙繭衣同向湖  
邊漉篷底平鋪水面浮綠楊陰裏無炎日一手持竿擊不  
停跳珠那顧霑衣溼卻有鄰孃作伴來渡頭閒話消岑寂  
道是新絲賣不留好絲又爲私逋質賴此粗庸不值錢至  
今尙是儂家物

生種藏種

吳興蠶書留種之要在先擇蠶大眠後當揀取整

齊強健之蠶日以蕪頭葉飼之

蕪胡貢切枝頂最茂盛也

一切驟換諸務

更宜勤慎老則另棚上之

育蠶要旨種爲來歲之計最宜

講究種蠶當另行看開必頻頻飼之不令稍餓上山時不可

用火採繭後安放靜處十八周後

如天熱不

有蛾飴出其繭

口金門爲上

黃銀門次之

出蛾後總在五鼓飯後即對對

媾也淺交不可過交亦不可

如未對即將雌雄捉成對

如雌多雄少雄蛾可復對解開時須

深黃昏

方可約申刻解開將布一方挂在空中捉蛾放上

亦有厚紙者

自能抱布須臾即生子矣出蛾當分三朝初朝不過數十隻

第二朝極盛三朝又少以後不可用矣

吳興蠶書原蠶生

子皆圍轉如錢不與諸蠶同至夏蠶之子則又散布而不成

圈矣 育蠶要旨收藏布種之法生種後其色必戰紫戰色

後可用石灰篩在上面交夏時必須用繇薄包外面用紙裹

好恐有蠹魚傷子待浴種時再打開浴後仍必包裹來歲方

得無礙 烏青文獻沃以線絲之湯則子不落貫以桑皮忌

麻苧之綫懸於涼處忌煙熏日炙大約留種繭十斤可得三

眠之蠶四十斤 擇繭之尖細堅厚者腰小者雄也腰大者雌也相兼而收

董蠶舟生種 大眠起擇蠶之健食者別置之倍與之食作繭與他繭異俟蛾破繭出取紙一方引蛾布

子其上謂之蠶布種蛾生子後棄水中府志曰小兒引蛾置水盆旋轉而遊祝曰阿蛾轉團團今年去了來明年

種蠶食葉一倍多作繭別貯留生蛾輪困密緻厚且白持

比他繭難同科閉置笥中過旬日栩栩齊看破口出龐軀

粉翅兩眉彎雌雄相對排成列赫蹠裁來一尺長將蛾引

著紙上方少焉生子已布滿如芥如粟紛難量鳥盡良弓

藏不用一時齊向東流送贏得兒童喜欲顛祝伊去了來

明年

董恂生種 蠶蛹之化天暖旬餘即出然極遲亦無過十八日者故俗有蛾頭長蛾頭短之語 種蠶

食葉倍於眾種蠶作繭大如甕莫辨蛾頭短與長已見蠕

蠕繭破縫須與蛾口出紛然粉翅修眉堪鄭重雌雄相配

各成雙軀腹胷肚子已種引蛾紙上密密生紛紜散布無

缺空似此么麼細已甚衣被翻為世所用一年一度轉團

團功業何人能與其卻恨蠶家太負心佳種生成水濱送

溫豐詠蠶蛾倏忽三生幻曹騰一夢長眉彎誇號國粉白

肖何郎對對交還固營營態更狂小姑年十五觀爾費猜



詳

望蠶信 遺閒瑣記 鄉人極重望蠶信有不至者以為失禮蓋

非特蠶時禁忌久絕往來亦以蠶事為生計所關故重之也

董蠶舟望蠶信 謝肇淛西吳枝乘曰吳興以四月為蠶月家閉戶里開往來慶弔俱罷不行謂之

蠶禁吾鄉里語謂之關蠶房門至纜絲時戚黨咸以豚蹄魚鱸果實餚餌相饋遺謂之望蠶信親串過從

情密通昏姻不出一鄉裏課晴問雨每相偕只隔盈盈衣

帶水一自蠶房深閉門從教彼此絕音塵不知蠶信今何

似消息傳來苦未真算來前日回山始料因今日纜絲起

江魚白白枇杷黃去問諸姑及伯姊沸耳伊軋搖車聲絲

竈滿室縱復橫入門一笑不須問黃上眉間喜氣盈

董恂望蠶信 育蠶無奈忙蠶節親朋遂使音塵絕道是蠶

家禁忌多不教來往成疏闊邇來鄰右競回山聞說收蠶

同一日未識收花得幾分搖船親自探消息門外相逢一

笑迎紅燈昨夜花曾結入門無暇道寒暄致語先教詰得

失歡呼只有稚兒慧翻道客休問盈歉試聽儂家軋軋聲

絲車十部纒還急

賣絲 湖錄 小滿之日必有新絲出市諺云小滿見新絲

沈樹本城南棹歌 白絲纒就色鮮妍賣與南潯賈客船載

去姑蘇染朱碧阿誰織作嫁衣穿

董蠶舟賣絲 鎮南柵有地名絲行墟列肆購絲謂之絲行商賈駢坐買絲者羣趨焉謂之新絲市行有

京莊廣莊經莊閭閻填咽駟儈忙一榜大書絲經去聲行就

中分列京廣莊畢集南粵金陵商商多竊揣絲當貴亟向

絲行埭上賣一車值不盈三千牙郎吹毛恣狡猾相逢南  
舍足穀翁亦爲買絲來市中向予搖手呼莫莫留待明年  
高價鬻深感翁言良不誣其奈霹靂飛縣符打門胥吏豺  
狼如不爾何以輸官租況復私逋遞相促二者兼償猶不  
足典去布襦幾時贖袴露兩尻跣雙足三旬勞勞睡不熟  
那得一絲身上著

董恂賣絲

吾鎮絲市最盛向之頓葉者至此則轉而頓絲焉

初過小滿梅正黃市

頭絲肆咸開張臨衢高揭紙一幅大書京廣絲經行區區  
潯地雖褊小客船大買來行商鄉人賣絲別粗細廣莊不  
合還京莊行家得絲轉售客蠶家得錢不入囊急尋過付  
算私債所負加一錢須償償時不難借亦易小民意計工

周防那知贏餘卻有限年年空爲他人忙

董攀龍潯溪竹枝詞街頭五月賣新絲莫價無煩設市師  
今日廣南來大估月明侑酒唱歌兒

溫豐南潯絲市行蠶事乍畢絲事起鄉農賣絲爭赴市市  
中人塞不得行干聲萬語聾人耳紙牌高揭絲市塵沿門  
挨戶相接連誼譁鼎沸辰至午駢肩累跡不得前共道今  
年絲價長番蚨三枚絲十兩市僧販夫爭奔走熙熙而來  
攘攘往一日貿易數萬金市人誰不利熏心但教炙手卽  
可熱街頭巷口共追尋茶棚酒肆紛紛話紛紛盡是買與  
賣小賈收買交大賈大賈載入申江界申江鬼國正通商  
繁華富麗壓蘇杭番舶來銀百萬計中國商人皆若狂今

年買經更陸續農人紡經十之六遂使家家置紡車無復有心種菽粟吾聞荒本逐末聖人憂蠶桑太盛妨田疇縱然眼前暫獲利但恐吾鄉田禾從此多歉收

酬神 遣閒瑣記里俗所祀蠶神曰蠶王天子曰馬鳴王菩薩

又有蠶花五聖 育蠶要旨凡寅申巳亥年大姑把蠶子午

卯酉年二姑把蠶辰戌丑未年三姑把蠶按馮應京月令廣義作四孟年大姑

四仲年二姑四季年三姑與今俗所傳者異

董蠶舟賽神府志曰俗呼蠶神曰蠶姑其占為一姑把蠶則葉賤二姑則葉貴三姑則候貴候賤吾鄉

俚俗亦有是說又蠶祠間有縗婦人像而乘馬者俗稱馬鳴王即搜神記所載馬頭娘也近日始有立廟祠苑窳者

育蠶之家出火大眠時皆祀神謂之拜蠶花利市其禮視蠶畢之祭為殺云 沍寒驟暖蠶無疴

燥溼有患煩護呵蛇鼠不耗葉不貴蠶姑降福亦已多貧

家何以酬神惠牲醴潔蠲恭報賽挈籃市物向街頭拚把新絲一車賣花冠雄雞大旒首佳果肥魚舊醪酒兩行紅燭三炷香阿翁前拜童孫後孫言昨返自前村聞村夫子談蠶神神為天駟配嫫祖或祀苑窳寓氏主九宮仙嬪馬鳴王眾說紛綸難悉數翁云何用知許事但願神歡乞神庇年年收取十二分神福散來謀一醉開圩明日到處同插秧農父多忽忽又將疊鼓祈先農

董恂酬神育蠶有秋生計足蠶家有願向神祝今年大好稱意收酬神拚費絲一握九宮仙嬪馬頭孃稽首焚香更燒燭甕中有酒新釀成割得雄雞配猪肉願神覆庇自年年絲滿筐籠繭滿箔大兒祈禱拜不休小兒索果爭唬哭

迎神已罷還送神酌酒撤肴事忙碌晚來團坐聚堂前得意高談散神福

田家占驗 志稿正月元旦侵晨占風東南來則稔東及東北次之西則歉一日為雞二日為狗三日為豬四日為羊五日為牛六日為馬七日為人八日為穀九日為蠶十日為麥晴則吉一日得辰為一龍治水至十二日得辰為十二龍治水少為雨多多為雨少一日得丑為一牛耕地至十二日得丑為十二牛耕地少為勞多為逸一日納音屬木為蠶食一葉至九日納音屬木為蠶食九葉少主貴多主賤入春暖則晴寒則雨諺云春寒雷則久雨若諺云春雷十日陰元宵大風主油貴忌雨諺云雨打正月二十日雨為天穿主雨多二月八

日為祠山神生日西南風主有秋前後必有風雨釀寒謂之

請客風送客雨諺云祠山大帝喫凍狗肉十二日花朝宜晴十五日雨主

歉驚蟄之前不宜有雷諺云未蟄先三月三日晴雨俱主葉

貴陰雲不雨則蠶大熟諺云三月三日晴桑上挂銀瓶寒食

宜雨清明宜晴清明斷雪穀雨斷霜亦諺春甲子宜晴諺云

子雨乘船入市四月十四日晴主歲稔諺云四月十四神仙二十日

忌雨蠶立夏小滿日宜雨五月有壬子破日主水諺云五月

打屋頭過七日八日十一日並宜晴諺云不怕端五端六只怕端

一十三日為關帝生日有雨主無疫癘俗稱磨芒種後逢丙

入梅小暑後逢未出梅或以芒種後逢壬入入梅日雨主旱

諺云高田只怕迎梅夏至宜雨忌西南風諺云夏至西夏至

後半月為三時頭時三日中時五日末時七日忌雷忌寒三

時以後東南風連晝夜日舶趨風主久晴二十日為分龍日

忌雷雨主旱前此雨行必徧此後雨則或廿一日雨主稔諺云

二十分龍廿一雨六月三日有雨則日日有之諺云六月初

石頭罅裏都是米六日宜晴雨主水小暑日雷主水諺云小暑一聲

晝耘田六日宜晴雨主水小暑日雷主水諺云小暑一聲

伏中日出時卯上有雲則有雨庚日有陣雨則連十日皆有

陣盛夏宜熱諺云六月不夏甲子宜晴諺云夏甲子七月七

夕雨主穀少立秋日忌雷諺云秋李丁卯日忌雨諺云雨打

中穰八月一日雨主旱白露後忌風雨諺云處暑雨田裏米

白露白迷迷廿四日為稻草生日雨則藁腐諺云憂憂憂憂

秋分稻秀齊廿四日為稻草生日雨則藁腐諺云憂憂憂憂

更頭九月九日宜雨主來年熟十三日晴則一冬少雨諺云九

晴釘鞵掛斷繩秋甲子宜晴諺云秋甲子十月內風頻作謂之五風

信十一月十七日為彌勒佛生日東南風則米貴西北風則

米賤冬至後九日有雨雪則每九皆然諺云除夏起十二月

上中二旬有雪來年梅水盛三日宜陰雨諺云臘月初三十

二日為蠶生日宜晴冬甲子宜晴諺云冬甲子大寒後戊日

為臘臘雪主年豐又諺語占豐歉有云有春好看蠶無春好

種田謂立柴貴荒年到米貴熟年來蒼蠅不喫貴米飯蒼荒

蚊熟蝦荒蟹亂占晴雨有云久旱逢庚落久雨逢庚晴丙不

藏日六月無夜陣東鸞日頭西鸞雨俗呼虹朝霞不出門夜

霞行千里攔朝雨好曬被明星照爛地有雨落弗泊早晴不

是晴晚晴曬殺人雨前蓬花不肯落雨後蓬花不肯晴細雨

不溼

塵者俗稱 蓬花雨 貓乾狗溼 貓飲水晴 狗飲水雨 占風有云春東風雨祖宗北

風兩頭凶南風腰裏硬西風不過西東風無休歇單日雙風

雙日單風占霧有云春霧雨夏霧熱秋霧涼風冬霧雪霧露

醒跳下井 言天熱也 三朝霧露發西風黃霉霧露雨到半路占寒

暖有云老健春寒秋後熱 言不 未喫端午糴寒衣不可送喫

了端午糴還要凍三凍 湧幢小品春雪不宜過多若多則

百廿日必有大風雨俗謂之雪報最傷農 諺云一百廿日雪水轉 又

俗云夏至有風三伏熱重陽無雨一冬晴驗之殊不然及閱

感精符云夏至酉逢三伏熱重陽戌遇一冬晴乃知俗說之

訛也 又吳中五六月間梅雨既過必有大風連數日土人

謂之船趕風云是舶商請於海神得之凡船遇此風日行數

千里雖猛而不為害 烏青文獻夏至後九九氣候云一九

二九扇子不離手三九二十七冰水甜如蜜四九三十六拭

汗如出浴 一作汗出如洗浴 五九四十五頭戴秋葉舞六九五十四

乘涼不入寺七九六十三上牀尋被單八九七十二思量蓋

夾被九九八十一家家打炭墜冬至後九九氣候云一九二

九相叫不出手三九二十七籬樹 一作 頭吹筆策四九三十六

夜眠如露宿 一作方纔凍得熟 五九四十五太陽開門戶 一作窮漢

街頭舞一作 六九五十四貧兒爭意氣 一作和尙不出寺一作

泥腿田 七九六十三布衲兩頭攤 一作布衲頭擔一作布

擔一作凍 八九七十二貓狗尋陰地 一作口 九九八十一

犁耙一齊出 一作三句云窮漢受罪畢 書城雜著占水旱

蒹葭初生剝其小白花嘗之味甘主水皯主旱梧桐花初生  
色赤主旱色白主水冬青花關係水旱其花不落溼地諺云  
黃梅雨未過冬青花未破冬青花已開黃梅雨不來鳳仙花  
五月開主水芒種前菟豆花開主水占豐歉桃李實多者來  
歲必稔占雨水鵲巢近地其年大雨占晴雨鳩呼婦晴逐婦  
雨鴉浴風鵲浴雨入哥浴斷風雨蜘蛛添絲晴弔水雨蜻蜓  
亂飛主雨魚浮水面主雨水氣腥立時雨水水面生青靛天公  
又作變

麗正達田家吟并序曩者避亂村居時與二三野老探節數  
時課時問雨其言多田家志諸書所不載間或小有異同  
總之不離乎測旱潦卜陰晴者近是農職也甲子秋臥病

無聊追憶舊聞十得三四戲綴七言以廣其意惟其拙而  
不工俗而不雅因命之曰田家吟固知壯夫不為聊為病  
魔解嘲云爾下看十六上初三半月陰晴仔細參日沒胭  
脂紅一色夜深風雨到窗南日沒後赤色如霞歷久不滅  
主風雨諺云日沒胭脂紅無  
雨也一窗曉日影瞳矓轉眼濃雲撩碧空開口東方紅  
似火須知閉口雨濛濛日出早色赤少頃雲起則雨  
立至諺云開口東方開口雨東  
北風來雨便傾至今贏得太公名上火下火更相接雨雨  
風風卒未晴東北風多雨諺云東北風雨太公  
遇火日多雨諺云上火弗落下火滴泥  
納音雞鴨今朝上宿遲明朝陰雨已先知老漁更說魚秤水新  
買蓑衣正及時雞鴨上宿遲則天將陰雨  
躍離水面謂之魚秤水主雨魚 壬子哥  
哥任自過後來爭奈甲寅何只愁三日連絲雨五十光陰

爛地多

壬子癸丑甲寅雨主久雨晴主久晴甲寅尤驗諺云壬子是哥哥爭奈甲寅何又云壬子癸丑甲寅

晴四十九日滿天星壬子癸丑甲寅雨四十九日踏爛泥

攔朝雨過青天出絮被家

家曬夕暉明日陰晴還未保夜來月亮着蓑衣

曉雨夕晴諺云攔朝

雨好曬被俗呼月為月亮月下

料峭春寒潤不收占晴

空自聽鳴鳩若非爛地照星月便是烏雲接日頭

鳴鳩有回聲者

曰呼婦主晴俗謂之開開窠晒無回聲者曰逐婦主雨俗謂之蓋蓋窠久雨時向晚驟晴忽見星月必再有雨諺

云星月照爛地有雨落弗泊日沒時下多

露白春霜

赤腳多春風隔宿雨滂沱更愁未蟄先驚蟄日日輕雷可

奈何春霜多雨諺云春霜弗露白露白便赤腳春風每

前雷主歲歉諺云未蟄先蟄人食狗桑葉清明雀口齊

蠶孃拍手笑相攜不須更借錢加一中市今年賤似泥清明

時桑葉如雀口形者主葉賤諺云清明雀口蠶孃拍手

蠶時貸錢富室蠶畢而償母十則子一謂之加一錢葉

價早晚不同有三月三日春光好野菜花開賽牡丹盤

饌朝來薦新味鱸魚齊上水邊灘俗呼齊曰野菜春暮老

云三月三野菜花開賽牡丹是時鱸魚極二月清明蠶

等葉三月清明葉等蠶三車小滿一齊動婦女縲絲男灌

田清明在二月則葉遲蠶早在三月則葉早蠶遲諺云二

車水車年年穀雨兩邊蠶似雪鵝翎埽最便纔出烏兒

細如髮最遲立夏趕頭眠諺云穀雨兩邊蠶穀雨前三五

也蠶始生日烏兒細如髮惟以鵝翎埽取則不傷蠶早

者立夏時已三眠俗日出火次者二眠最遲者始頭眠諺

云立夏趕頭絮襖還宜禦早涼蠶桑纔了正分秧勸君

未喫端陽糉莫送寒衣壓故箱小滿後時有薄寒故曰種



稷寒衣弗可送喫了 夏至有風三伏熱重陽無雨一冬

晴酉逢戌遇憑修飾天籟還推第一聲 夏至日風主三伏

一冬少雨諺云夏至有風三伏熱重陽無雨一冬晴此語頗古昔人有改有風作酉逢無雨作戌遇者然不似田家

本色 二十分龍廿一雨一年米抵兩年收 釀錢便作青

苗會私債官糧不用愁 五月二十日為分龍日次日有雨

年收得兩年米 驅蝗之神曰猛將村社塑像甚小 鄉民於六七月間旗繖鼓樂迎行阡陌謂之青苗會 時

裏西南暮復朝栖潭老鯉亦心焦那知一日偏相拗夏至

西南沒小橋 夏至日起時頭時三日二時五日三時七日

裏西南老鯉栖潭時裏西北老鯉上屋惟夏至 日西南風則又主潦諺云夏至西南沒小橋 忽然小

暑一聲雷依舊濃陰晝不開卻笑天公十八變不辭兩度

作黃梅 芒種後逢壬日入霉天氣晴雨不常諺云黃梅天

十八變 小暑日雷主久陰諺云小暑一聲雷倒

轉做 黃梅 六月初三逢陣雨恰如膏澤灑芳田農夫不用愁

辛苦上書耘田下書眠 六月初三有陣主雨水調勻諺云

困俗呼睡曰困午前 日上書午後曰下晝 雨絲多自北風生埽盡炎氛枕簟

清一事問人殊未解隔田塍處換陰晴 夏日北風多雨諺

日陣雨有相隔不半里即 無雨者諺云夏雨隔田塍 雨餘若見橫雲起明日扶桑

旭影紅東鬣日頭西鬣雨一彎細認美人虹 虹朝見主雨

呼曰鬣諺云東鬣日頭西鬣雨更有形如斷虹直起尋 丈不亘天作橋形者俗謂之橫雲久雨後見之必晴

彭祖空延八百齡東南陣發不曾經誰知帶過西南陣積

水如池兀未停 陣雲自東南起者無雨諺云彭祖活八百

諺云西南陣 帶過落三寸 漸覺涼生暑氣蠲秋前十日作秋天從今

白露身休露料理寒衣放薄縣 立秋前有時天氣驟涼諺

云秋前十日作秋天入白

露後天漸寒  
露後天漸寒  
露後天漸寒

好是今年朝立秋  
好是今年朝立秋  
好是今年朝立秋

涼颼颼暮立秋  
涼颼颼暮立秋  
涼颼颼暮立秋

頭漸見銀河轉  
頭漸見銀河轉  
頭漸見銀河轉

涼颼颼暮立秋  
涼颼颼暮立秋  
涼颼颼暮立秋

涼颼颼暮立秋  
涼颼颼暮立秋  
涼颼颼暮立秋

涼颼颼暮立秋  
涼颼颼暮立秋  
涼颼颼暮立秋

白迷迷幾日秋  
白迷迷幾日秋  
白迷迷幾日秋

雲低遮日則  
雲低遮日則  
雲低遮日則

天河入角過  
天河入角過  
天河入角過

堪喫飯與梳頭  
堪喫飯與梳頭  
堪喫飯與梳頭

十月日最短  
十月日最短  
十月日最短

啄微爲借門前  
啄微爲借門前  
啄微爲借門前

來未下秧燕子  
來未下秧燕子  
來未下秧燕子

信漸颼颼菱母  
信漸颼颼菱母  
信漸颼颼菱母

斷繩休重陽  
斷繩休重陽  
斷繩休重陽

網斷麥怕清明  
網斷麥怕清明  
網斷麥怕清明

暖便種租田亦  
暖便種租田亦  
暖便種租田亦

露一朝霜鄉民  
露一朝霜鄉民  
露一朝霜鄉民

霜早稻便登場  
霜早稻便登場  
霜早稻便登場

白米燥糶糠近  
白米燥糶糠近  
白米燥糶糠近

市人目之曰乾  
市人目之曰乾  
市人目之曰乾

至晴乾年邈邈  
至晴乾年邈邈  
至晴乾年邈邈

前後晴主年終  
前後晴主年終  
前後晴主年終

如鷺縮朝來負  
如鷺縮朝來負  
如鷺縮朝來負

蓋窠冬至九九  
蓋窠冬至九九  
蓋窠冬至九九

至晴乾年邈邈  
至晴乾年邈邈  
至晴乾年邈邈

前後晴主年終  
前後晴主年終  
前後晴主年終

如鷺縮朝來負  
如鷺縮朝來負  
如鷺縮朝來負

蓋窠冬至九九  
蓋窠冬至九九  
蓋窠冬至九九

雪後南風多陰  
雪後南風多陰  
雪後南風多陰

雨多陰雨九裏  
雨多陰雨九裏  
雨多陰雨九裏

南風如鷺縮冬  
南風如鷺縮冬  
南風如鷺縮冬

雪花

飛雜雨如絲無歇無休惱客思底事天晴消不得卻因等

伴故遲遲雨雪雜下不易晴諺云夾雨夾雪無休

無歇積雪不消日雪等伴必更有雪

南溟志卷三十一終

